



Niuspepa bilong ol Papua Niugini stret

# Wantok 121

## REDI LONG KRISMAS



Nogut yu ting em ol lain bilong Tahiti. Nogat ya. Em Nancy Mathew na Labi Geita bilong KilaKila Viles. Ol redi long singsing bilong krismas.

Ol KilaKila i redi nau long krismas. Long Sande 23 Novemba ol i makim pinis ol lain bilong wokim singsing.

Insait long ples i gat 5-pela bikpela wanpisin. Olgeta yia wanpela bilong ol dispela wanpisin i save go pas long dispela selebresen. Long dispela yia em

taim bilong Badu wanpisin long go pas long ol selebresen.

Dispela pasin i bin stat long 1960. Wanpela lapun pasto bilong ples, Mista Eava Onno i bin statim. Em i laik bai olgeta pipel in-sait long ples i bung wantaim long taim bilong krismas. Long dispela taim ol

man i save go painim abus long bus na ol meri i go painim paiawut na kisim kaikai long gaden. Tasol nau dispela i senis. I no gat moa abus long bus bilong ol, na ol ples bilong mekim gaden i no gutpela. Olsem na ol pipel insait long ples save baim tasol kaikai na bungim long ples.

Long dispela yia tu ol Mahuru Eregabe yut grup bai resis wantaim ol arapela pipel long ol poroveta singsing. Bikman bilong Badu wanpisin, Mista Rabura Madaha bai go pas long dispela selebresen.

Poto na stori Yova Gelta.

# MIPELA INDAI NATING

€ Liklik pikinini meri bilong mi kisim bikpela sik. Sua i kaikaim insait long bel bilong em. Tasol, i no gat Medikal Odeli long Et Pos. Em i ranawe i go pinis long ples bilong em long Menyaya, klostu long Menyamya stesin.

“I no gat man long givim em marasin. Olsem na mi holim tasol liklik meri i stap na em i dai pinis.”

“Bihain long dispela mipela i harim olsem, sampela pipel i wok long indai long dispela sik tasol. I go i go na 9-pela pipel olgeta indai pinis long ples bilong mi long Umba.”

Dispela em stori bilong Tengofiyoga Imeguiengywo, wanpela stuakipa bilong ples Umbai insait long Menyamya distrik. Sik nogut tru karamapim ples bilong ol.

Pastaim tru kaskas na sua i kaikaim insait bilong bel bilong man. Na bihain man i go bagarap tru. Em i painim hat tru long pulim win. Taim em toktok, bai no gat nois i kamap. I gat gripela susu i kamap long maus taim em i spet.

### KILIM 36 MAN

Dispela kain sik i kilim pinis samting olsem 36 man, meri na pikinini insait long ol ples long Menyamya long Morobe provins, stat long mun Oktoba.

Ol ples olsem Umba, Aiwamba, Wapisika, Samjai, Kambasipa, Aipa, Sigeapa, Injipa, Kongodia, Ami na Yekwe i bagarap pinis long dispela sik.

Long wik i go pinis, 4-pela mausman bilong dispela

ol ples i kam daun long Mosbi long tokaut long wanem samting i kamap long ples bilong ol.

Dispela 4-pela man em Tengofiyoga, Imeguiengywo bilong ples Umba, Roland Kokaye bilong ples Hakwange, Haki Togota bilong ples Nanive na Tipa Mangivamokoi bilong ples Umba.


Dispela 4-pela man i kam long opis bilong Wantok Niuspepa na stori long dispela sik nogut i wok long kilim planti pipel long ples bilong ol.

Ol i tok, “Mipela kirap salim toktok i go long namba wan kiap long Menyamya stesin olsem dispela sik i kilim indai planti pipel bilong mipela nau. Tasol kiap i no mekim wanpela samting.

“Mipela i tok save tu long hetman bilong helt senta long stesin. Mipela i tok, odeli i mas kam bek long Et Pos na helpim mipela. Tasol olgeta tok i go lus nating.

“Olsem na ol i no tingting long ol pi-

*I go moa long pes 2*



Tengofiyoga (lephan) sanap stori long indai bilong pikinini meri bilong em. Wanples Tipa i sanap wantaim em.



**INVESTMENT CORPORATION OF PAPUA NEW GUINEA.**



SEA PRAIS - NOVEMBA 1980  
(Prais bilong sea wantaim fi mani)

50 sea	K 56.00
100 sea	K 112.00
150 sea	K 168.00
200 sea	K 224.00
250 sea	K 280.00
300 sea	K 336.00

Wok bilong salim na baim bek ol sea bilong dispela fan i bihainim tasol ol toktok i stap insait long Prospektus. Prais bilong wan wan sea long Novemba 1980 em i K1.12. Prais bilong baim bek sea em i K1.10 - 2t i raus long baim koporesen.

Plis salim wanpela Prospektus buk bilong yupela i kam long mi. **TO: INVESMEN KOPORESEN, P.O.BOX 155, POT MOSBI.**

NEM: .....

ADRES: .....

# OL NUPELA KA BILONG GAVMAN

## LAIK BOSIM OL PABLIK SEVAN

Namba tu Praim Minista Mista Okuk, na ol sampela arapela bikman i singaut long senisim as lo bilong yumi. Ol i tok aninit long as lo ol bikman (potitisen) i no gat inap pawa long bosim ol pablik sevan. Ol bikman i mas i gat pawa long senisim o rausim ol pablik sevan, o pawa long makim nupela long kam insait long wok gavman.

Tasol aninit long as lo gavman i gat pawa long bosim ol pablik sevan. Aninit long as lo (konstitusen) gavman inap long tok na ol pablik sevan i mas harim. Aninit long as lo ol pablik sevan i no ken mekim wok politik.

Olsem taim dispela ripot bilong ol bikman i kamap planti ol pipel i long-long nabaut. Olsem wanem ol bikman i laik go insait na bosim tru ol pablik sevan. Ol i gat save long ol dispela wok tu? O wanem as tru long ol dispela ripot?

Ol pipel i lukim planti mistek i kamap long han bilong ol bikman. Ol i lukim sampela i kot pinis. Ol i lukim tupela i wok long sanap long kot. Ol i lukim kain kain stail na pasin bilong ol bikman. Ol i lukim ripot bilong Ombudsman Komisnin pinis.


Long ol dispela samting tasol ol pipel i no bilip tumas long ol bikman. Ol i no bilip ol i gat save inap long go insait tru long wok bilong pablik sevis. I gat wok bilong ol. Mobeta ol bikman i larim pablik sevis i ranim wok bilong ol, na ol pablik sevan i larim ol bikman i mekim wok bilong ol.

Gavman i baim pinis, 31 nupela otometik ka bilong givim i go long ol Minista. Nem bilong ol dispela ka em Toyota Crown, Royal Saloon. Ol ka ya em bai senisim narapela lain ka em ol minista i wok long i go i kam long en nau.

Dispela nupela ka i otometik. No gat gia. Yu daunim baten tasol na glas bilong windo i surik i kam daun, yu no inap tuhat insait. Insait bilong ka i olsem kolwin opis stret.

Gavman i baim dispela 31 ka long K209,560. Wan wan bilong dispela nupela otometik ka i kos long K6,760.

Namba tu sekeri bilong Plant na Transpot insait long Dipatmen bilong Woks na Saplai, Mista Andrew Temu i tok, Gavman i no baim dispela ka long nupela mani. Mani bilong baim ka i kam long mani em Plant na Transpot i rausim long ol gavman ka ol minista i wok long yusim.



Ol nupela otometik ka bilong ol gavman minista i slip nating i stap long Woks na Saplai long Boroko. PSA i tokaut olsem ol draiva i no inap draivim ka inap gavman i apim pe bilong ol na ol mekanik tu. Gavman i tromoi K209,560 long baim 31 nupela ka bilong senisim olpela ka bilong ol Minista. Wanpela bilong dispela nupela ka bai go long Sif Jastis, Mista Buri Kidu. Narapela 24 ka bai i go long wan wan minista na 6-pela bai was tasol i stap olsem senis.

Tasol lida bilong Oposisen, Mista Michael Somare i tok, dispela tok i no stret. Long wanem, gavman bai lusim K45 long wan wan ka insait long wanpela de. Na tu dispela 3 pela kolwin ka, bilong Praim Minista, namba tu Praim Minista na Spika bai kaikaim samting olsem K70, insait long wanpela de. Olsem na olgeta ka wantaim bai kaim K474,000 long olgeta ya.

Mista Somare i tok, Gavman i putim samting olsem K500,000 long baset long ranim ol ka bilong Minista long yia 1981. Ol i no tok klia long ol pipel olsem dispela ol ka bai kaikaim moa mani. Em i tok, ol ka bai kaikaim samting olsem K1.2 milion long yia 1981 na i no K500,000.

Mista Temu i tok, ol i skelim wanpela ka i go long Sif Jastis, Mista Buri Kidu. 24 ka bai i go long ol 24 minista. Tasol Praim Minista na namba tu bilong em na Spika bilong Palamen i gat ka bilong ol yet, na ol i no inap yusim dispele ol ka.

Ol narapela 6-pela ka bai stap tasol olsem senis. Sapos sampela arapela ka i

bagarap na go long woksap bai ol minista inap yusim ol dispela 6-pela ka.

Nesenel Eksekutive Kaunsil i tok orait tu long baim 29 ka long helpim ol wokman long wan wan dipatmen. Dispela ol ka i no kam yet long PNG. Pe bilong wan wan ka em K2,585. Olgeta 29 ka wantaim bai kos K74,965.

● Ben Kasanda

## Mipela indai pinis

i kam long pes 1

pel i kisim bikpela bagarap na stap long ples. Ol i tingting long stap long haus kapa bilong ol long stesin tasol. Provisal gavman na ol patrol opisa i no harim tok bilong mipela olsem dispela sik nogut i kilim mipela.

Sampela i kam tasol ol i givim sut na marasin long ol pikinini. Ol i no bin givim long ol yangpela manmeri. Na planti indai yet.

"Mipela i sutim tok i go long 2-pela provinsal memba bilong mipela tu.

Ol i no stap long ples olsem bai ol i bringim wari bilong mipela i go long provinsal gavman. Planti taim ol i slip long Lae Siti na ol i no kam long ples.

"Sik i wok long i go isi isi na karamapim ol ples insait long Menyamya distrik. Mipela i ting moa pipel bai indai sapos ol marasin i no kam hariap."

### MINISTA I KAM

Dispela 4-pela man i tok, ol i amamas long Minista bilong Helt Mista John Jaminan i go

lukluk raun na autim dispela sik long nesanel gavman.

"Sapos memba bilong mipela long Nesanel Palamen, Mista Neville Bourne na Mista Jaminan i no autim dispela wari, ating bai ol kiap na ol helt opisa long Morobe provins inap larim mipela dai nabaut long dispela sik."

Long wik i go pinis, namba tu sekeri bilong helt insait long Morobe Provins, Dokta Labong Jonah, i tokaut olsem ol i stapim pinis ol-

geta helt sevis na ol i rausim tu 120 wokman bilong helt.

### RAUSIM ODELI

Helt Dipatmen i rausim planti ol Et Pos oldeli, ol nes, leba man na ol draiva long wok. Dispela, long wanem, i no gat inap mani i stap long dipatmen bilong baim dispela ol wokmanmeri.

Dokta Jonah i tok, wok bilong helt bai bagarap tru insait long provins.

Na nau nesanel gavman i singautim ami i go helpim ol



Ol 4-pela tokman bilong ol ples long Menyamya i stori long sik nogut i kisim ol. Kirap long lephan? Haki Togota bilong ples Nanive, Roland Kokaye bilong ples Hakwange, Tenofyoga Imenkywo na Tipa Mangivamokoi bilong ples Umba.

pipel long dispela distrik i gat bikpela sik. Tupela dokta i bin go lukluk pastaim.

Mista Bourne i tok, olsem nau et pos odeli i go bek gen long ples Umba. Tasol, em i no gat save long rot bilong pasim dispela bikpe-

la sik. Na long las Sande, 23Novemba, planti moa pikinini i kisim sik no gut.

Em i tok, "Planti pipel yet i wokim graun na putim long pes long soim sori bilong ol." Em i tok 36 manmeri indai insait long hap bilong Safeyoka. Tasol nau dispela sik i kamap pinis long Menya na samting olsem 50 pipel i dai long dispela hap.

Mista Bourne i tok, dispela trabel em wankain ol hevi bilong ol pipel bilong Menyamya bilong bipo yet. "Ol pipel traim kisim helpim long RIP fan na VEDF fan, na bisnis.


"Tasol, ol i pain-

Stat long yia 1979, nesanel gavman i kirapim wanpela komisnin bilong lukluk long ol birua i kamap long Menyamya distrik.

Ripot i go long palamen long tude, 25 Novemba, long dispela yia. Na Praim Minista Sir Julius Chan i tok, nau gavman i skelim dispela ripot na tingting long wanem samting i mas kamap long helpim ol pipel o long stapim ol birua i kamap long hap.

Tasol, long ples Umba, lain bilong Tengofiyoga i kraiyet. ● Ben Kasanda

## TAMBU TORO



# LUKAUT LONG WOK GOL

Sapos wok gol i go het bai nem bilong Porgera i raun long olgeta kona bilong PNG olsem nem bilong Niugini Golfied, Panguna na Ok Tedi.

Olsem na Bisop Waesa bilong Gutnius Luteran Sios i askim ol bikman long sios long tokaut gut long ol pipel. Ol i mas tokim ol long olkain samting nogut na gutpela samting bai kamap long dispela wok. Bihain ol pipel yet i ken lukim na kamapim tingting bilong ol yet long dispela samting.

Em i tokim ol pipel long no ken lukim gutpela mani ol bai kisim nau tasol long gol main. Ol i mas tingting tu long ol samting nogut bai kamap bihain, long taim dispela wok main i go bikpela.

Gutnius Luteran Sios i tromoi sampela toktok bilong em pinis long soim tingting em i gat long wok bilong painim gol long Porgera, Enga Provins. Ol i ting, dispela wok bai bringim sampela samting nogut i kam bihain.

Ol kampani i laik kisim ol man nau long go wok. Dispela lain kampani tu i laik katimaut bikpela sait tru long wanpela maunten.

## SKELIM GUT

GLC i laikim Enga Provinsal Gavman long skelim gut olkain gutpela samting bai kamap long laip bilong ol pipel na ples we dispela wok bai kamap long en. Ol i askim provinsal gavman long skelim sindaun bilong ol pipel long taim bihain.

Wanpela bikpela kwesten tru ol i askim em, long taim gol i pinis, wanem samting i stap long helpim ol pipel bilong Enga? Ol i laikim Enga Kristen Kaunsil na Enga Provinsal Gavman long skelim dispela kwesten na plen long helpim ol pipel.

Long yia 1938, wanpela kiap i bin go patrol insait long bus long wanpela nupela hap bilong Hailans. Bipo, gavman i bin putim tambu long ol ausaitman i no ken kam insait long dispela hap bilong Enga Provins.

Dispela kiap i patrol na i painim wanpela liklik hap gol. Em i bin ting, dispela hap gol i liklik tumas. Olsem na em i no wari tumas long en. Em i lusim tingting olgeta long en.

Tasol nau, ol i painimaut olsem, bikpela gol na silva tru i stap long dispela hap ol i kolim Porgera.

## 3-PELA KAMPANI

I gat tripela kampani i wok long painim gol long Porgera nau. Ol kampani ya em long Maun Aisa Mains em i gat 30 pesen sea), Konsolidetet Golfil (em i gat 30 pesen sea tu) na Placer PNG (em tu i go 30 pesen sea).

Gavman bilong PNG i gat 10 pesen sea. Placer PNG em i kampani bilong PNG. Na tupela arapela kampani ya tupela i bilong Australia.

Dispela tripela kampani bai painim gol long Porgera. Placer PNG kampani i bin painim gol long Wau na Bulolo bipo.

Dispela tripela kampani i statim wok long dispela hap long yia 1969. Ol i statim wok pas tasol ol i no namba wan lain long painim gol long dispela hap. Namba wan man em i wanpela kiap, Mista John Black.

Long 1938, Mista Black i patrol wantaim wanpela arapela man, Jim Talyor long dispela hap. Mista Black i painim wanpela hap gol ston. Tasol em i bin ting olsem, i no gat planti moa i stap.

Ol i wok long painim gol long wanpela ples 40

kilomita longwe long Porgera stesin stret. Long Jun 1962, gavman i tekeweim tambu em i bin putim long ol ausaitman i no ken kam insait long dispela hap bilong Enga Provins.

Long taim gavman i tekeweim tambu, ol pipel i pulim lain i kam long painim gol. Ol i makim wanpela hap i stap long ol asples pipel yet i painim gol long en. Na Jim Taylor na J.J. Searson i raun painim gol arere long wara Kaiyu namel long Porgera na Kagai.

Tripela kampani ya i mekim wok painim nau aninit long namba tri kontrak bilong ol.


Namel long 28 Jun 1969 na 7 Februari 1980, ol kampani ya i lusim samting olsem K1,427,408 (wan milion 427 tausen, 480 kina) long painim gol.

Sapos ol dispela kampani i ting, i gat inap gol long mekim bikpela wok, ol bai lukluk long tupela samting pastaim. Ol bai lukluk long ol samting bilong bus na ol abus.

Opis bilong bosim ol Bus na Abus wantaim Placer PNG i bin askim sampela saveman long mekim wanpela ripot long dispela ples. Ol bai lukluk na mekim ripot long ples bilong tromoi pipia ol

I go moa long pes 6

# Nupela haus piksa



I luk olsem Kai Kafe long Boroko i laik kamap nupela haus piksa long Mosbi. Sapos yu go kaikai orait yu ken lukim televisen wantaim. Tasol boi ya i no wari long kaikai. Em pasim ples pinis na wanwe tasol. Lukaut, nogut papa bilong haus kaikai i rausim yu.

# Stevens kalabus 14 yia

Long Fraide, 21 Novemba, 1980 kot long Pot Vila, Vanuatu i salim wanpela ripot i go long kot pinis long skelim gut dispela 14 yia mekim save ol i bin givim long em.

Kot i sasim Mista Stevens long planti samting tru. Ol i sasim em long kamapim ami na mekim wok ami, bagarapim ol samting, brukim lo long holim pasim ol plis na ol opisa bilong Gavman, kisim ol samting em ol arapela pipel i bin stilim, stiaim wanpela muvmen em lo i tambuim, wokim ol paspot na wokim pasin bikhet.

Em i tok, i tru em i rong long mekim olgeta dispela samting. Kot i tokim em long baim ol sampe-la rong.

## BAIM KOT

Mak bilong sampela mani ol i tokim em long baim kot ya i no pilai. I bikpela tru. Olsem na nau bai dispela man i bin go pas long ol rebel i pait egensim independens long Vanuatu bai stap wetim askim bilong em tasol. Sapos kot i ting,

dispela mekim save i bikpela tumas, bai ol i daunim liklik. Na sapos ol i ting, dispela mekim save i stret long ol rong em i bin mekim, orait, dispela lida bilong ol rebel i mas go kalabus 14 yia olgeta.

Dispela loman i sanap makim olgeta arapela rebel, Monsieur Leder i bin makim Jimmy Stevens long toktok long kot.

Monsieur Leder i tok, ol ami bilong Frans na Englan i bin kam insait long Vanuatu long laik bilong ol yet. Na Praim Minista bilong Vanuatu i no bin askim ol long kam insait. Em dispela lain i bin kam pas long Vanuatu long stapim ol trabel bilong ol rebel.

Tasol ol i no bin mekim wanpela samting. Orait, Pater Walter Lini i askim PNG long salim ami bilong PNG i go na helpim Vanuatu. Em nau, Kumul Fos i go na pinisim olgeta trabel na ol rebel i kisim mekim save bilong ol pinis. Las rebel tru long kot em Jimmy Stevens.

I luk olsem bai Jimmy Stevens i stap kalabus inap tupela yia samting na bihain Gavman i laik salim em i go long wanpela ailan ol i kolim Pentecos Ailan.

Ol pipel hia i

orait long em i kam. Tasol ol i tok em i no ken bringim olgeta meri bilong em i kam wantaim. Ol pipel i tok olsem Pentecos em i Kristen ples na ol i no laik em i bringim ol 29 meri bilong em. Em

i ken bringim wanpela tasol.

Gavman i laik salim Jimmy i go long dispela ailan bikos ol i sori liklik long lapun.



Jimmy Stevens wantaim Kenel Tony Huai taim em i kam toktok wantaim Gavman bilong Vanuatu.



## Stretim Kimbe maket

Dia Edita — Plis inap yu givim mi liklik spes long Wantok Niuspepa na mi putim liklik wari bilong mi. Wari bilong mi olsem.

Lukluk bilong mi long Kimbe maket em i no gutpela long ai bilong mi. Planti PMV ka i save go insait long maket ples na bikpela das i save kirap na bagarapim ol kaikai. Das i save go long ol kumu, tomato, na ol karamap kaikai em ol meri i save salim long maket.

Dispela em i no stret long tingting bilong mi na mi askim ol bikman bilong dispela hap long tingting gut na traim putim kolta insait long maket. Em bai stapim das long no ken go long ol kaikai ol manmeri i save baim.

Em tasol wari bilong mi. Yu husat wantok yu laik bekim pas bilong mi o sapatim mi em orait tasol.

Idor Muram  
Kimbe, WNB.

## Westim mani long Dash 7

Dia Edita — Mi bin ritim na tu mi bin harim long redio long nupela balus Des 7.

Mi bin ritim wanpela ripot i tok dispela nupela balus bai kaikaim moa bensin.

Mi ting olsem dispela bai mekim ol rabisman i kamap rabis na ol maniman bai kamap ris na ating dispela em i plen bilong Chan gavman. Na narapela samting tu man husat i givim ripot i tok F27 na F28 em i no save kaikaim bensin moa na spea pat tu i isi long painim klostu.

Mi ting dispela Des 7 bai i kaikaim bikpela mani long ranim na lukautim.

Long dispela as mi ting gavman i westim mani nating. Em i no gutpela long yumi o gavman i baim dispela balus. Dispela mani i bikpela mani tumas na ol i tromoi bilong helpim ol maniman na i no helpim ol manmeri long ples stret.

Ol pipel i no askim long balus olsem na yu laik baim, planti provins i krai long ol liklik projek bilong ol. Na tu mi ting i gutpela long gavman i yusim mani long eduketim ol manmeri long hap bilong Ok Tedi pas-taim na ol i fedi long wanem senis i laik kamap long hap

bilong ol.

Kain wok olsem Adal Edukesen, yut grup, lo na oda na planti ol kain liklik wok olsem. Mi ting sapos maniman i kamap ris bai planti raskol pasin i kamap moa long wanem ol i no gat mani na wok. Mobeta gavman i yusim dispela mani bilong helpim ol manmeri bilong ples.

Mi ting Mr Okuk na Chan gavman i aipas. Mobeta yu lusim balus na wok-abaut i go long ples bilong PNG na lukim sindaun bilong ol manmeri na askim ol long wari bilong ol long development.

Gavman em i bilong pipel i no bilong baim jet long 6 milion kina na lusim bikpela mani gen long wok bilong ol bikman Mobeta yu askim laik na tingting bilong ol pipel, pastaim na baim kain bikpela samting. Traim na lukluk no ken pasim ai.

Kelis K.  
Lae



Salim ol pas  
kam long  
WANTOK  
BOX 1982  
BOROKO

## Yusim ol MP ka gut

Dia Edita — Inap long yu givim mi liklik spes long pepa bilong yu long mi autim liklik wari bilong mi. Wari bilong mi i go olsem.

Mi wanpela sumatin bilong Kila Kila Haikul long Mosbi na mi wari liklik, long wanem, i luk olsem, ol memba bilong Palamen (MP) i no save lukautim gut ol ka bilong Gavman em ol i stap yusim long dispela taim. Na i no longtaim bai Gavman i lusim bikpela mani long fiksik ol o nogat long baim ol nupela ka.

Dispela em i long wanem, sampela dra-

iva bilong ol dispela ka i save yusim ol dispela gutpela gutpela ka bilong Gavman olsem ol pipia ka bilong ol yet na raun long biknait tru na painim blakmaket.

Mi laik givim wanpela gutpela eksampel mi bin lukim long tupela ai bilong mi na harim tu long tupela yau bilong mi. Em hia wanpela long ol man i save draivim wanpela long ol dispela MP ka.

Wanpela biknait em i bin karim dispela MP ka na i go kamap long haus bilong mi na painim bia long blakmaket

## Wari long haikul

Dia Edita — Inap long yu givim mi liklik spes na bai mi ken autim liklik wari bilong mi. Wari bilong mi i go olsem.

Long Tambul distrik insait long Westen Hailans Provins, mipela i gat 9-pela komyuniti skul. Tasol ol i no save mekim gut long kisim ol pikinini long dispela 9-pela skul long go long haikul. Long 8-pela arapela komyuniti skul ol i save kisim 15, 14, 13, 18, 19, 8, 9 na 7-pela pikinini. Na long komyuniti skul bilong mipela em Alkena Komyuniti skul, ol i save kisim 4-pela pikinini tasol.

Mi stap tingting planti tru long dispela. Mi ting, em i no gutpela samting ol i wok long mekim. Sampela skul ol i kisim planti manki tru i go long haikul na long mipela i no planti tumas.

Olsem, long komyuniti skul bilong mipela, mi kamap namba 5 long eksemisenen. Bai ol i kisim 4-pela tasol na mi bai i no gat nau. Olsem na mi tingting planti. Em tasol mi raitim liklik wari bilong mi.

Simon Nonga  
Tambul, WNB.

na mi kirap nogut tru. Mi askim em long wanem samting em i kam painim na em i tok, em i painim "BIA." Mi kirap nogut tru, long wanem, i biknait nogut tru pinis ya. Na mi tok, sori, no gat bia. Olsem na mi tingting olsem wanem long dispela kain man.

Na long moning-taim, mi bin harim olsem, dispela man tasol i bin karim meri bilong wanpela man Simbu husat i bin wok long solwara.

Dispela meri na draiva tupela i poroman na raun gut tru.

Na ol wanples bilong man bilong meri ya i bung na tok long kukim dispela Gavman ka. Na

tu ol i bin tok long hamaim dispela draiva.

Na mi sori tru olsem, bai Gavman i spendim bikpela mani long baim nupela MP ka. Sapos yupela i no bilipim mi na mekim wanpela samting hariap, bai trabel i karamapim yupela tru. Yupela i mas save, em ol Simbu ya. Bai yupela i painim ka bilong yupela na draiva bilong yupela aninit long graun.

Em tasol. Na plis yupela i mas mekim wanpela samting hariap bipo dispela samting i go nogut.

Yagkinde John  
Korobusea, Mosbi.

## Minista mas lusim su

Dia Edita — Inap yu givim liklik spes long mi autim liklik wari bilong mi olsem.

Mi no laikim Gavman i baim nupela balus bilong ol mi-

nista. PNG i gat planti hevi i stap na Gavman i mas isi liklik long spendim mani. Mi no laikim dispela mani K15 milion na K20 milion ol i spendim long rot bilong ol minista.

Na Dash 7 balus tu bai painim na stretim wanem bilong PNG? Yu no ken giamanim ol pipel votim yu i go long Palamen long pulim su na soken bilong yu i go antap na yusim ka bilong Gavman na kisim bikpela mani na lusim tingting long ol man long ples. Bai yu painim hevi bilong PNG olsem wanem sapos yu stap mekim dispela tasol?

Mobeta yu rausim su na soken na gut-

pela ka na haus na wokabout long lek i go insait long bikbus brukim maunten na lukim hevi bilong ol man long ples. I gat planti skul i gat haus morota o kunai na haus sik i gat haus morota o kunai. Na planti provins i no gat kot bilong ka i helpim ol pipel.

Yu mas lusim su na soken na nektai na wokabout long lek na lukim. Dispela bikpela mani yu lusim nating nau inap helpim ol hevi bilong planti provins. Dispela mani inap helpim ol provins i gat rot bilong ka na putim kapa long ol skul na haus sik na bai ol pipel i ken i gat bisnis bilong ol yet. Na mi ting, yu amamas long baim balus olsem bai yu i ken go long ol ovasis kantri tasol.

Em tasol wari bilong mi.

D. Kumaing  
Panguna, NSP.

## Memba grisim manmeri

Dia Edita — Inap yu givim liklik spes long mi long autim wari bilong mi. Wari bilong mi i go olsem. Long Sarere 1 Novemba 1980 mi bin ritim pas i kam long brata ya Mista Zachary Anbai. Em i bin tok olsem, ol memba ol i save grisim ol manmeri nating ol votim ol. Yes brata yu tok tru tasol mi no ken sapatim yu.

Sapos yu laik kamap olsem memba bilong ples bilong yu bai yu wokim wanem? Ol lain manmeri bilong yu tasol bai votim yu. Sori tumas mi ting yu i no inap kisim bikpela namba. Nau yu harim ol memba i gat rait long go raun long narapela hap na grisim ol manmeri blong votim ol. Piwa Hilenda Gordons High School

# MIPELA SAVE MEKIM OLKAIN WOK BILONG BENK

☆ Pas Buk

☆ Sek Buk


☆ Man i ken putim mani long benk na winim profit mani.

☆ Sapos yu kisim narakain mani bilong wanpela kantri, benk i ken senisim i kamap kina na toea.

☆ Benk i ken stretim olgeta tiket bilong yu, sapos yu laik go lukluk raun long arapela kantri.

**Bank of New South Wales (PNG) Ltd.**

## Mipela amamas tru long helpim yu



Senta bilong helpim ol tarangu long Madang. Man hia i wok long samapim wanpela basket.



Man, lek bilong em i dai pinis em i yusim han long samapim bilum.

# SKULIM OL TARANGU



Klostu long Imanuel Luteran sios long Madang i gat wanpela spesel kain skul. Em i bilong skulim na trenim ol sikmanmeri i gat han lek nogut, o sampela gat sik lepra.

Elevenpela dispela kain sikman i save wokabaut i kam olgeta moningtaim long wok bilong ol. Planti i slip long Madang haus sik. Em i no longwe. Kain sikman/meri olsem pret long go bek long ples. Nogut ol pipel i kros long ol long wanem ol i no inap helpim ol long wok. Nogut ol pipel i tromoim ol, i rausim ol, o larim ol i dai long hangre. Em i pasin bilong sampela ples.

Olsem hia long dispela "selp - help senta" ol inap kisim skul long yusim han bilong ol. Na olsem, sampela i winim K5 long potnait. Ol i save kisim kaikai na bet long haus sik. Pe ya em i bilong klos na bilas samting.

Wantok ripota i go lukim ol man i wok i stap long dispela senta. Sampela i samapim klos long masin bilong ol. Sampela i ainim klos na wokim na sapim kom long mambu, na droim bilas long "T" Siot.

I gat wanpela stua bilong salim olkain klos na kaving na bilum na basket. Insait long wan wan mun ol inap long winim K900 samting long dispela stua.

Pastaim dispela wok na dispela aidia i kamap long Luteran skul bilong ol nes, long taim em i stap yet long Yagaum. Tasol nau haus sik long Yagaum i no moa stap, na ol i bin givim olgeta samting bilong mekim dispela wok long selp-help-senta.

Immanuel Luteran sios long Madang i givim fri dispela haus we ol manmeri mekim dispela wok. Planti tisa i kam na i wok wantim ol tarangu. Ol i wok nating. I no kisim pe.

Na planti grup na asosiesen i helpim dispela wok. Em nem bilong sampela hia: Provinsal Gavman, Sen Vinsen Di Pol Sosaiti, Kantri Wimens Asosiesen, Laions klap, Rotari klap, Ret kros, Luteran sios, Katolik sios, na ol dokta na nes bilong Madang haus sik.

Inap nau misin lida Baddeley i ranim na bosim dispela senta. Em i laikim tumas bai moa lokal pipel i go insait long dispela wok.

Man bilong stiaim ol wokman bilong senta ya em i Mista Pita Pengai. Bipo em yet i wok insait long dispela senta. Nau em i kisim save pinis na sik bilong em tu i pinis na olsem em i stap bek olsem lida bilong wok. Tasol em i laik painim sampela moa kristen wantok i laik helpim em long mekim wok mari-mari long ol tarangu. ● Frank Mihalic



No waris, man i save wokim ol naispela piksa long ol kain kain string.



Lapun ya i wokim kom na i stretim mambu long paia.

## PRIMIA NAMBA 6

Mista Leo Hannett i bin pinis long wok politik. Tasol long taim em i winim ileksen bilong wok primia bilong Not Solomons, orait, em i kam bek nau na stat paitim wok politik gen. Mista Hannett i marit na i gat tupela pikinini man.

Solomons i kisim olgeta pawa bilong kamap provinsal gavman.

Mista Hannett i wok i stap na em i lusim wok na i go stap long ples. Em i go stap na statim bisnis kakao na bisnis long wok timba. Em i stap i kam inap long taim em i winim ileksen bilong primia.

Long taim ol Bougainville i laik bruk lusim PNG long 1973, Mista Hannett i lusim skul bilong em long Hawaii na kam bek long helpim ol lain bilong em. Em i bin wanpela bikman long dispela muvmen. Sif Minista bilong dispela taim, Mista Michael Somare i lukim olsem na kisim em i kam kamap advaisa bilong em. Tasol Mista Hannett i gat narapela kain tingting olgeta long kain tingting bilong Mista Somare. Olsem na Mista Somare i rausim em.

Long 1977 Mista Hannett i kamap namba wan provinsal seketeri bilong Not Solomons. Long dispela taim tu, wok bilong provinsal gavman i no ran gut na Nesenel Gavman i tekeweim pawa bilong ol i mekim wok. Ol i stap liklik taim bihain na Not



Leo Hannett

# MANI BILONG OL TOLAI

Long Is Nu Briten Provins, sikispela girigiri i hangamap long hap kanda, em inap long K1. Dispe-la em i "tambu". Na tambu em i mani bilong ol Tolai.

Las yia 12-pela girigiri inap long mak bilong K1. Tasol long dispela yia prais bilong giri-giri i go antap. Olsem na nau 6-pela girigiri tasol inap long K1.

Wanpela bikman bilong Kikitabu long Is Nu Briten, Mista Daniel ToRot i tok, tambu em i mani bilong mipela. Na mipela i ken baim planti bikpela samting wantaim dispela mani.

Em wantaim wanpela arapela bikman, Mista Nerius ToGia tupela i tok, ol pipel bilong arapela hap i gat dispela mani i no inap yusim long baim olkain samting olsem ol Tolai yet. Nogat. Ol inap yusim long sampela samting tasol.

Girigiri em i wan-

## WANTOK SENSUS RESIS

Wantok Niuspepa i kisim pinis moa long wan tausen wan handet na fifti seven (1,157) pas long sensus resis.

Long ol dispela pas, 294 pipel i tok i gat moa long 3 milion pipel insait long kantri.

Wanpela pas i tok, i gat 366 milion pipel. Na wanpela pas i tok, PNG i gat 700 pipel (seven handet) tasol.

Olpera namba gavman i bin tokaut em long 3,168,700 (tri milion wan handet na siksti et tausen seven handet).

Tasol dispela em namba bilong ol pipel bilong Papua Niugini stret. Ol i no putim namba bilong ol pipel bilong arapela kantri husat i stap insait nau long PNG.

Long krismas Wantok bai kolim nem bilong ol man i win long dispela resis.

Namba wan prais K100, namba tu prais K50 namba tri prais K25.

### WANTOK NIUSPEPA

Nius i kamap 52 taims long yia nau.

Opis bilong Edita na Edvetaising long P.N.G.  
P.O. Box 1982, Boroko  
Telipon: 25.2500 Teleks: NE 22213

Edvetaising long Australia  
Central Media Sales, Sydney  
Telipon: 436.1000 Teleks: AA23211

### PE BILONG WANPELA YIA, 52 NIUSPEPA

Ples	Kam long balus	Long sip
Mosbi	K 10.00	K 10.00
P.N.G.	K 14.00	K 14.00
Australia	A\$36.00	A\$29.00
N.Z, Fiji		
Pasifik Ailan	NZ\$47.50	NZ\$32.00
USA. Yurop	US\$70.00	US\$47.00
	DM 120.00	DM 81.00
	L 31.00	L 21.00



Daniel ToRot na Nerius ToGia sanap namel long ol tambu mani bilong ol. Ol wantok bilong ol i lukluk i stap.

Foto - Gaudi - O.I.

pela bikpela samting tru long ol pipel bilong Wes Nu Briten. Bikos i no gat ol dispela sel long Is Nu Briten, ol Tolai i save senisim samting

wantaim ol lain Talasea na kisim girigiri.

Dispela tupela lain i senisim ol samting long taim bilong ol tumbuna yet. Ol Tolai i save skulim ol Talasea long ol singsing, marila na pasin bilong mekim ol yangpela boi i kamap man.

Buka tu i gat ol dispela girigiri. Ol Tolai i save baim girigiri long ol Buka tu. Wanpela emti tin bilong tin pis inap long K10. Sampela girigiri i kam long Buka, tasol planti tru i bilong Talasea.

Ol Tolai i save go baim ol girigiri pinis, orait, ol i kam bek na putim long kanda. Ol man i save

kisim kanda na katkatim i go liklik tasol i mas longpela olsem 1 yad. Orait, ol meri i sindaun na pasim ol girigiri long kanda.

Ol i pasim pasim i go pinis, em bai luk olsem tupela taia bilong wilwil yu putim wantaim. Wanpela meri inap kisim tri wik olgeta long wokim wanpela tambu.

Pastaim tru ol meri i save pasim 12-pela girigiri long liklik hap kanda. Na dispela ol i kolim "param". Ol i kisim dispela na pasim long bikpela 1 yad kanda. Wanpela meri i ken wokim wanpela param long sampela aua tasol.

Daniel na Nerius

tupela i tok, ol lapun i stap yusim tambu yet, long wanem, ol i painim olsem, ol samting tude i kos bikpela mani moa. Olsem na i isi long yusim tambu long baim ol dispela samting.

Kina na Toea i no inap baim ol bikpela samting olsem, pe bilong meri na pe bilong wokim singsing. Daniel i tok, "Olsem na mipela i yusim Kina na tambu wantaim na mekim ol bikpela wok."

Pe bilong meri em i antap tru. Na pe bilong baim hap graun tu em i antap moa yet. Olsem na ol i save baim hap mani long Kina na hap gen long tambu.

A.K. Rumber

## WOK GOL

I kam long pes 3 i kamautim long painim gol.

Na ol saveman bai skelim tu sapos ol marasin i kam long dispela wok bai bagarapim ol wara na ol samting i stap klostu, o nogat.

Na las samting dispela kampani bai lukluk log en em long Gavman bilong kantri. Sapos wok bilong Gavman i ran gut inap long taim ol kampani ya i bekim dinau bilong ol, orait, ol kampani ya i ken tingting long go het long wok. Sapos dispela tri-

pela samting i orait, bai wok i go het.

Nau ol i wet tasol long wok long maunten Waruwari i pinis long 1981. Wok i pinis, orait, tripela kampani bai tokaut long plen bilong ol.

Sapos i gat gutpela ripot i kam long ol lain saveman ya, bai ol i mekim sampela moa wok painim long maunten Rambari. Sapos nogat, ol i no inap mekim wok painim moa insait long dispela ples. I gat rot i go pinis

long ples bilong painim gol.

Wanpela samting tu long dispela main em long gol na silva i pas i stap long ol ston. Olsem na ol i ken karim tasol long ka o balus i go long ol bris. Ol i no mas putim gol long ol bikpela transport olsem pang (barge) long karim gol i go long ol ovasis maket. Ol liklik sip inap mekim dispela wok.

Bihain long 1981 pastaim, bai dispela tripela kampani i tokaut long wanem ol samting bai kamap. ● Anna Rongap

## S - NIUS - NIUS

\*TAMBUIM PIPIA BOM — Japan i no inap tromoi ol pipia bom samting long Pasifik olsem em i bin tok long mekim pastaim ya. Pastaim Japan i laik tromoi pipia bom tasol ol kantri long Pasifik i kam bung wantaim na bikmaus nogut tru long dispela aida bilong Japan. Olsem na Japan i tok, bai em i harim tok bilong ol kantri long Pasifik. Nogut gutpren i stap namel long ol nau bai pinis.

\*PASIFIK AILAN KISIM SELP GAVMAN — Tripela Pasifik ailan i kam hia long Saut Pasifik Festival ov Ats bai kisim selp gavman bilong ol nau long Amerika. Tripela ailan kantri ya em long Palau, Masal Ailan na Federetet Stets ov Maikronesia. Dispela tripela ailan kantri bai stap kisim helpim yet long Amerika inap long taim ol ailan kantri ya inap tru long olgeta samting.

\*PNG EM INAP TU — PNG bai stap insait tu na mekim wok long Ynaitet Nesens Yia bilong ol Tarangu. Kabinet i givim oke long dispela samting pinis. Na ol i tokaut tu olsem, PNG bai givim K15 tausen long helpim dispela wok.

\*ENGA I SOT LONG TISA — Provinsal Edukesen Bot bilong Enga i laik spendim K15 tausen nau long raun long kantri na grisim ol tisa bilong arapela hap long kam tis long Enga. Tokman bilong Edukesen Bot i tok, Enga i sot tru long samting olsem 100 komyuniti na haikul tisa. Nau bai ol i raun na tokim ol tisa nabaut long kantri olsem, Enga i no ples bilong pait olsem ol i save harim oltaim. Em i giaman tok tasol.

\*GAVMAN MEMBA KISIM MOA PE — Ol provinsal memba bilong Westen Hailans Provinsal Gavman i pasim tok pinis olsem, olgeta memba long provinsal asempli bai kisim 50 pesen moa pe antap long pe ol i save kisim nau. Ol memba nating i save kisim K132. Orait, nupela pe bilong ol nau bai i go antap K198. Ol minista na primia na namba tu bilong em bai kisim antap liklik long ol memba nating.

\*MAN I KILIM OL ARAPELA — Wanpela man bilong Not Solomons i sanap long kot nau, long wanem, em i bin kilim wanpela lapun man, wanpela meri na tupela pikinini long Nissan ailan long las wik Fraide. Long Sarere, ol plis i go long Nissan na holim pasim wanpela lapun man na bai askim em long dispela tabel.

\*OL LIKLIK LOTU NO KEN KAM — Gavman i mas wokim wanpela lo long pasim ol nupela liklik lotu i no ken kam insait long PNG bikos nogut ol i paulim tingting bilong ol pipel long wok kago (bembe). Planti ol liklik lotu i laik pulim planti manmeri long bihainim ol. Tasol ol i no tingting long helpim sindaun na pasin tumbuna bilong ol pipel. Nogat. Provinsal Sekreteri bilong Westen Hailans, Mista Gabriel Waipik i tok olsem.

\*BENG HELPIM OL WELPAM FAMA — PNG Dvelopmen beng i plen pinis long givim dinaumani i go long ol man i save groim welpam. Prais bilong welpam i daun tru nau. Olsem na beng i laik givim ol dispela mani long apim pe bilong welpam i go antap inap K10 samting. Dispela plen bai stap inap 12 mun tasol.

\*AIR NIUGINI GAT NUPELA JENERAL MENESA — Wanpela man bilong Wes Nu Briten i kisim pinis wok Jeneral Menesa bilong Air Niugini. Em i Mista Joe Tauvasa. Em i bin stap tasol olsem Jeneral Menesa pastaim. Tasol nau ol i makim em long mekim dispela wok.

\*HAISKUL NA YUNIVESITI KOSTIM BIKPELA MANI — Mak bilong mani Gavman i save yusim long salim ol studen i go long haikul olsem. Sapos Gavman i spendim K1 long wanpela sumatin long praimer skul, orait, em bai spendim K15 long wanpela studen bilong haikul. Na em i save spendim narapela K75 gen long wanpela studen long Yunivesiti o long wanpela bikskul. Olsem na Praim Minista i tokim ol studen long ol skul olsem ol i kaikaim bikpela mani tru bilong Gavman. Olsem na long taim ol i kisim wok, ol i mas helpim ol manmeri i no kisim wankain skul olsem ol.

# NIUS I KAM LONG OL POTO



**ALJERIA.** Bikpela guria nogut tru i kam na bagarapim tru Aljeria. Planti pipel i kam lukim ol bikpela haus em dispela guria i brukim. Wan mun tasol bipo, wanpela guria i bin kam na bagarapim dispela hap. Nau bikpela tru i kam na pinisim ples stret.




**AMERIKA:** Presiden bilong bipo, Mista Gerald Ford i sanap amamas wantaim nupela presiden, Mista Ronald Reagan na namba tu bilong em, Mista George Bush.



**IRAN:** Woa long Iran na Irak i stap yet. Long dispela poto, ol niusman i raun lukim ol kain samting bilong poto bilong ol lain ami bilong Iran. Ami bilong Irak i kisim ol dispela samting na i kam bungim i stap long Irak. Wanpela soldia bilong Irak i was i stap.



**ENGLAN:** Mis Jemani, Gabriella Brum i win moa...em i kamap Mis Wol. Em i win tasol boipren bilong em, Benno Bellenbaun i no laikim em i kisim dispela bikpela namba. Olsem na narapela meri i kamap namba wan pinis. Krismas bilong Benno em 52 na meri ya em 18 tasol.



**KARABIEN:** Planti manmeri/pikinini i wok long ranawe lusim ples bilong ol, Haiti. Dispela poto i soim, Odette Jean-Paul, wanpela ranaweman i hangre nogut tru na tarangu em i slip tasol i stap wetim sip i kam kisim em. Wanpela wantok bilong em tu i wet klostu i stap.

# Yu ting wanem



Robert Kamia

Robert Kamia bilong Tari, Saten Hailens Provins. Em i wok long Pablik Sevis Komisin.

Robert i tok em i no amamas long dispela toktok. Ol poli-

tisen i no ken bosim olgeta wok bilong ol pablik sevan. Ol politisen i mas save olsem ol i ken wok wantaim ol pablik sevan, tasol ol i mas save tu olsem gutpela wok bilong pablik sevis bai bagarap sapos ol politisen i laik bosim olgeta wok.

Taim dispela i kamap bai pablik sevis i kamap olsem wanpela politikel oganaisesen na i no mekim wok bilong ol pipel insait long kantri.

**DEPUTI PRAIM MINISTA, MISTA IAMBAKEY OKUK I TING OLSEM OL PABLIK SEVAN I GAT PLANTI PAWA TUMAS. EM I TING OLSEM DISPELA I NO STRET. MISTA OKUK I LAIK BAI OL POLITISEN I KISIM DISPELA PAWA EM NAU I STAP LONG HAN BILONG OL PABLIK SEVAN. MISTA OKUK I TOK OL POLITISEN I MAKIM OL PIPEL INSAIT LONG KANTRI.**


**WANTOK RIPOTA I ASKIM SAMPELA PIPEL INSAIT LONG MOSBI LONG TINGTING BILONG OL.**

Maria Teki i kam long Simbu Provins. Em i wok wantaim Nesenel Kalsa Kaunsil.


Maria i tok em i no laikim dispela toktok bilong Mista Okuk. Ol politisen i ken wok gut wan-

taim Pablik Sevis tasol ol i no ken bosim olgeta wok bilong ol pablik sevan. Wok bilong ol pablik sevan em long givim sevis i go long ol pipel. Sapos ol politisen i bosim wok, bai i no gutpela tumas.

Wok bilong pablik sevis tu i bikpela tru. I gat plenti komplek i save kamap long en. Tasol sapos ol politisen i laik go bosim olgeta wok, bai wok i go bagarap olgeta.



Maria Teki



Yala Amos

Seki Ua bilong Sentral Provins. Seki i wok long Opis bilong Lida bilong Oposisen.

Seki i tok, pablik sevan na wok politik i ken wok gut

Yala Amos bilong Erave, Saten Hailans Provins na i wok wantaim Air Niugini.

Yala i tok dispela dispela aidia bilong Mista Okuk i gutpela. Planti ol pab-

lik seven nau ol i wok politik na em i no gutpela. Wok bilong ol pablik sevan em long sevim ol pipel na i no wok politik. Sapos ol politisen i bos, bai ol i ken save wanem pablik sevan i wok

gut, na husat i bikhet.

Taim ol pablik sevan i holim wok ol i promis long wok wantaim gavman tasol sampela bilong ol i no bihainim promis.



Harry Harihi

Florence Solomon bilong Maprik, Is Sepik Provins. Em i wok long Johnson's Famasi.

Florence i tok, mi no laikim dispela tingting bilong Mista Okuk. Ol politisen i no ken bosim Pablik Sevis.

Harry Harihi i kam long Galp Provins. Em i wok wantaim Remington opis long Mosbi.

Harry i tok em i no laikim dispela toktok bilong Mista

Okuk. Sapos ol politisen bosim olgeta wok bilong Pablik Sevan bai ol wok i paul nabaut. Insait long pablik sevis tu i gat ol sampela opisa bilong ol arapela kantri. Ol i kam

wok long kontrak. Sapos ol politisen i kisim olgeta pawa insait long pablik sevis planti bel pen i ken kamap namel long ol dispela opisa.

Ol politisen i save long wok politik na ol pablik sevan i gat wok bilong ol long mekim. Sapos wanpela lain i laik bosim narapela bai i gat sampela hevi i kamap namel long tupela.



Florence Solomon

# OMBUDSMAN TOKTOK

Taim bilong nupela nesenel ileksen i klostu nau. Na Ombudsman Komisn i tok, ol bikman i mas kamapim ol lo nau bilong pasim ol politikal pati i laik baim ol pipel long votim ol long 1982 nesenel ileksen.

Nau em i 5-pela yia bihain long independens. Tasol i no gat spesel lo yet bilong helpim ol politikal pati o ol kendidet long taim bilong ileksen. Gavman i no oraitim wanpela lo long dispela samting yet.

Wanpela ripot bilong Ombudsman Komisn i kamaut i no longtaim i go pinis i tokaut kliia long dispela samting. Em i tok, ol lain i papa bilong aslo bilong PNG i luk save pinis olsem, wok bilong politikal pati bai gro bikpela. Na planti politikal pati bai traime kisim bikpela mani long mekim wok bilong pulim ol pipel i vot

long ol. Na ol lain papa ya i tok, dispela bai kamapim ol kain kain pasin no gut.

Olsem na aslo bilong yumi i tok, i mas i gat lo bilong pasim ol pati i laik mekim dispela kain. Na i mas i gat lo bilong helpim ol arapela pati na ol kendidet tu.

Ombudsman Komisn i putim wanpela ripot long Palamen long mekim wanpela lo bilong dispela samting. Ombudsman Komisn i mekim dispela askim long yia 1976. Komisn i stap subim ol bikman long mekim wanpela samting long dispela askim bilong ol. Tasol i kam inap nau, i no gat wanpela samting i kamap yet.

Tokman bilong Komisn i tok, i mas i gat lo bilong putim mak long wanem samting ol politikal pati i save mekim.

Na i mas i gat lo bilong makim hamas mani ol politikal pati i ken yusim long olkain wok. Na tu i mas i gat lo bilong pasim ol pati i no ken kisim grismani long taim bilong raun na pulim ol manmeri bilong mekim vot.

Na lo i mas lukaut tu nogut sampela politikal pati i baim ol pipel long votim ol. Ol dispela samting i mekim Komisn i wari nau. Na Komisn i laikim bai i mas i gat lo long ol dispela samting bipo narapela ileksen i kamap.

Ripot bilong Komisn i tok, taim bilong nupela ileksen i no longwe tumas. Olsem na Gavman i mas mekim lo nau bilong mekim ol politikal pati na ol kendidet i lukim wanem samting ol i ken mekim, na wanem samting ol i no ken mekim.

# Wes Irian ripot

Planti trabel i kamap nau long Irian Jaya bikos ol lain bilong Fri Papua Muvmen i kamapim planti trabel na brukim gutpren namel long ol pipel bilong Irian Jaya na Gavman bilong Indonesia.

Ami komanda bilong Irian Jaya, Brigadia Jeneral Santosa i bin mekim dispela tok long wanpela seremoni i makim de bilong independens bilong Indonesia.

Em i tok, ol lain rebel bilong Fri Papua Muvmen i save kam insait long taun na ol pipel i save helpim ol na givim kaikai long ol. Brigadia Jeneral Santosa i givim tok lukaut i go long ol asples pipel long no ken bihainim aidia bilong ol rebel.

Brigadia Jeneral Santosa i mekim dispela toktok bihain long taim Komanda bilong Fri Papua Muvmen, Brigadia Jeneral Zeth Rumkorem i bin kam lukluk raun long ol ples klostu long taun. Em i lukluk raun i kam long ol liklik patrol pos bilong ol Fri Papua

Muvmen i stap nabaut long Jayapura haiwe.

Pastaim tru long 27 Septemba, 1980 lida bilong ol rebel i go lukluk raun na bungim ol pipel bilong Tanamerah. Pinis, orait, em i katim i kam olgeta long Genyem long wanpela ples ol i kolim Singgiriway. Em long Sande 5 Okotoba.

Long dispela hap Brigadia Jeneral Rumkorem i bungim planti pipel tru. Bihain em i paitim toktok wantaim kepten bilong ol lain rebel long dispela hap, Yence Hembring. Bihain long nait em i kaikai na toktok amamas gut tru wantaim ol pipel. Long 5 klok long moning, ol lain bilong Yence Hembring i givim tok tenkyu na tok amamas i go long lain i putim kamap dispela bung wantaim Brigadia Jeneral Rumkorem.

Na long namba 8 de bilong mun Oktoba, 1980 em i makim distrik komiti bilong Fri Papua Muvmen.

Brigadia Jeneral Rumkorem i mekim

dispela lukluk raun bilong em wantaim namba tu bilong em, Mista Yoweny na ol wasman na sampela ami. Em i makim distrik komiti long dispela hap pinis, em i go gen long makim nupela distrik komiti long ol arapela hap.

Em i go makim ol nupela distrik komiti long Samy, Bonggo, Serui, Nabire na Manokwari. Em i raun gut tru mekim dispela wok bilong em.

Ol man i save raun kisim stiltok bilong ami na Gavman bilong Indonesia i painim hat tru long painim bos bilong ol rebel na ol lain bilong em. Na ol i no kliia Brigadia Jeneral Rumkorem i hait we nau.

Ol asples manmeri bilong Wes Irian tu ol i no laik givim tok save long ol lain bilong Indonesia ya. Ol asples pipel i no laik bai Gavman bilong Indonesia i holim ol lain bilong Wes Papua Gavman. Olsem na ol i no helpim ol Indonesia.

Nius hia i kam long Nait Lait, Wantok ripota long Wes Irian



**Stand by Savings**  
**Stand by Savings**

SP5154

# Wantok Yut Awat



Duncan Dobunaba na Vele Rupa i makim plang bilong wokim ol tebol bilong skul kentin long Gordons Haiskul.

Olgeta mun bai Wantok i givim wanpela Yut Awat long wanpela yut i mekim sampela gutpela wok. Sapos yu laik kam insait long dispela resis salim stori na poto bilong yu i kam long Wantok Yut Awat, Box 1982, Boroko.

wantaim dispela kalp bilong ol.

Duncan i tok tu olsem bihain bai ol i go aut na bung wantaim ol arapela yut insait long Pot Mosbi. "Nau tasol mipela i kirapim dispela klap. Bihain bai mipela kisim ol arapela yut i kam insait long klap."

Nau i gat samting olsem 30 sumatin i stap insait long dispela klap. Duncan em i presiden bilong klap, Vele Rupa vais presiden, Violet Amini kuskus na Marie Kila bosim mani.

Long taim Wantok Ripota i painim em, Duncan wantaim ol arapela gret 10 sumatin i wok long mekim sampela wok.

"Mi laik kamap wanpela dokta taim mi pinis long skul. Kantri bilong yumi i no gat inap dokta". Duncan Dobunaba wanpela gret 10 sumatin long Gordons Haiskul i bin mekim dispela toktok long Wantok ripota.

Long mun Septemba Duncan i bin kirapim wanpela yut klap long skul bilong em. Ol i kolim dispela klap long Hai Y.

Duncan i bin kisim dispela aidia long taim em i wok wantaim Y.M.C.A. long

holide bilong em. "Mi toktok wantaim ol lain bilong Y.M.C.A. long Pot Mosbi long dispela aidia bilong mi. Ol i ting em i gutpela aidia na ol sumatin long skuk tu i laikim dispela aidia."

Insait long dispela klap ol sumatin i save piali spot, ritim Baibel na wokim ol kain resis olsem pasel (puzzle) na kwis (quiz).

Insait long Pot Mosbi i gat wanpela kain klap olsem long KilaKila Haiskul. Ol sumatin bilong Gordons i bin pilai



bilong skul kentin.

Ol i pinisim ol ekseminesen bilong ol na ol sumatin i wok long ol liklik porjek insait long skul.

Duncan Dobunaba i gat 17 krismas bilong em na em i bilong ples Wamira insait long Milne Be Provins. Long 1981

bai em i go long Yunivesiti bilong Papua Niu Gini long skul long kamap dokta.

● Anna Rongap

**FLY**

**PE TRU NUPELA PE MANI YU PASIM**

POM-LAE	K54	<b>K33</b>	K21
POM-WEWAK	K109	<b>K66</b>	K43
POM-MADANG	K76	<b>K46</b>	K30
POM-MT. HAGEN	K76	<b>K46</b>	K30
POM-GOROKA	K65	<b>K39</b>	K26
MT. HAGEN-GOROKA	K27	<b>K17</b>	K10
MADANG-GOROKA	K26	<b>K16</b>	K10

Nupela "Stand - by" (redi tasol) pe bilong baim tiket i helpim yu tru long ran long smatpela balus bilong Air Niugini.

Sapos yu laik ran long dispela nupela tiket em i isi tru. Yu mas mekim olsem;

\* Kisim mani nau go stret long Air Niugini opis na baim tiket.

\* De yu laik kisim balus yu go stret long ples balus. Go stret long ples ol i makim "Stand - by". Na givim nem bilong yu long tiket opisa. Ol man i go pas bai kisim sia kwik-taim. Ol man i kam bihain i mas wet.

Air Niugini Standby Fares...  
 a great way to fly and save.

**AIR NIUGINI**

THE NATIONAL AIRLINE OF PAPUA NEW GUINEA



Yu ting Sanguma Ben tasol i gat kain kain samting long wokim musik. Boi ya i kisim wanpela bokis mani na pairapim wantaim ol dram. Musik i narakain tru.



Hawks pilai wantim P&T. Ol i pilai long 1978 long Boroko P.R.L.



Man ol meri i no isi. Namba 15 i kisim taim long han bilong 4-pela meri wantim.



Lukaut, ol dokta i wari long ol kain takel olsem ol i pret, nogut meri i kisim bagarap.

# RAGBI PINIS NAU



Bipo ol meri long Mosbi i pilai ragbi lig tasol we stap dis-pela pilai bilong ol meri nau? Ragbi lig bilong ol meri i stat long Ogas 1977 na i stap inap wan yia tasol.

Presiden bilong ragbi lig bilong ol meri, Misis Bernadette Clem i tok, ol i no moa pilai ragbi lig bikos i gat sampela birua.

Namba wan em long kain bilong pilai ragbi lig i no gutpela long ol meri. Ol kain takol i

strong tumas na ol meri inap kisim bagarap long sampela arapela kain samting insait long pilai ragbi.

Misis Clem i tok, ol dokta yet i bin tokim mipela olsem, pilai ragbi lig em i no gutpela pilai bilong ol meri. Ol dokta i tok, sapos ol meri i no pundaun gut long taim bilong takol, ol inap kisim taim nogut stret.

Samtaim ol sampela meri i pilai ragbi long taim ol i kisim bel pinis. Dis-pela i nogut. Ol dokta i bin tok, i

nogut long ol mama long pilai ragbi. Ol dokta i tok, sapos wanpela mama i kisim bikpela bagarap tru, husat bai lukautim ol pikinini bilong em?

Misis Clem i tok tu olsem, wanpela as tu bilong ol meri i no pilai ragbi moa, em i bikos ol meri i no bung wantaim long mekim olkain wok. Em i tok, sampela meri i laik pilai tasol. Na long stretim wok bilong ragbi lig em ol i no laikim.

Ol meri i bin i gat 16 tim olgeta. Na insait long wan wan tim i gat 17 meri i

pilai long en. Namba bilong olgeta meri i 270. Tasol Misis Clem i tok, i no gat wanpela meri i save kam sanap long kisim mani long men stedium o redim ol samting bipo ol pilai i stat.

Misis Clem i bin kamapim wanpela kibung i no long-taim pinis. Em i singautim ol kepten bilong ol tim, ol komiti memba na ol pilaia long kamap na kibung. Ol i laik toktok long wanem samting ol bai mekim long mani ol i gat i stap nau long beng.

Namba tu samting ol i laik toktok long en em sapos ol i laikim ol pilai long neks yia o nogat. Tasol i no gat planti meri i kamap. Sikispela meri tasol i kamap.

Ol i pasim tok olsem, pilai i no mas stat gen long neks yia. Ol i tingting tu long givim mani ol i gat nau i go long ol haus sik, Cheshire Hom o long wanpela tarangu grup.

Rebecca Guruma em i wanpela biknem long ragbi lig bilong ol meri. Em i pilai long Demons tim. Tasol ragbi lig i

givim em bikpela bagarap tru inap tu yia nau.

Nau yu ken lukim Rebecca i wokabout wantaim stik. Dispela stik i helpim em long wokabout gut. Long wanem, tupela skru bilong em i bagarap. Em i tok, em i no klia wanem taim bai em i wokabout gut gen. Em i ting, bai mas long-taim liklik pastaim, orait, skru bilong em i orait gen na bai em i ken wokabout gut gen.

Em i ting, ragbi lig bilong ol meri i mas pinis olgeta. Ol meri long kantri i no ken pilai ragbi moa. Na em i laikim bai i gat spot klinik bilong helpim ol manmeri i kisim bagarap long ol arapela spot.

Tingting bilong Misi Clem i narakain liklik. Em i tok, ol meri i mas pilai wanem kain pilai ol i laikim. Na i no gutpela long tambuim ol meri long pilai ragbi. Em i nogut.

Misis Clem i tok, em i tru olsem, sampela meri i kisim bikpela bagarap long taim ol i pilai ragbi lig.

## kukim kaikai

### SUP BILONG KAKARUK

Ol samting yu mas i gat:

We bilong wokim:

6-pela kap wara yu kukim kakaruk long em.  
1-pela liklik anian.  
1-pela liklik karot.  
2-pela tebolspun rais.  
Sol na pepa.  
Hap tebolspun bata.

1 Katim anian, karot, kaukau na ol arapela kaikai i go liklik liklik.  
2 Putim ol i go long sup bilong kakaruk na kukim.  
3 Taim kaikai i kuk pinis putim sol na pepa i go. Sapos yu laik sup i strong liklik, orait putim liklik plaua insait long en.

## Mama kisim namba



Koava Laho i sindaun wantaim susa bilong em Valaro Laho na bebi Evelyn. Valaro i soim namba bilong em olsem opisa bilong bosim ol haus buk.




# Smat na strong moa yet

## ISUZU TLD

I gat planti  
ISUZU TLD trak ol i bin  
wokim long wokim wanem  
kain wok yu laikim long en.  
I olsem semen mixa trak,  
prisa trak, winis trak,  
tipa trak na planti moa.  
Go nau long

**NEW GUINEA MOTORS**

... ol save man bilong trak



TUBU NCM 034

# 1968

# WOK BEMBE LAIK SLEK LONG BUKA

# 1980



Jon Teosin taim long 1968 taim em i kirapim wok bilong Hahalis Welfea Sosaiti.



Ol wasman bilong bikman bilong Welfea Sosaiti i sanap wet klostu long ka bilong sosaiti.



Ol sampela meri memba bilong sosaiti.

Sapos yu stap long Is Sepik Provins na yu kolim nem Ambukanja, orait, olgeta pipel i save pinis yu laik tok long wok bembe bilong Yaliwan.

Sapos yu go long Not Solomons na yu kolim nem Hahalis, orait, olgeta pipel i save yu tok long Hahalis Welfea Sosaiti. Na wantu ol i tingim bosman bilong dispela lain, em Jon Teosin tasol.

Stat long yia 1954 i go inap long 1967 samting, Jon Teosin i bin givim planti hevi long Gavman bilong Papua Niugini na bilong Australia wantaim.

### STATIM SOSAITI

Jon wantaim trupela poroman Jiansis Hagai na Sawa Karatsi na sampela bikman bilong ples Hahalis i statim Sosaiti bilong ol long yia 1954. Ol tingting long painim mani hariap long bihainim stail bilong ol waitman i stap long Buka.

Hahalis em i wanpela viles i stap long nambis bilong Buka Ailan. Ol viles nabaut long en, olsem Hanahan na Gogohe na Lemmananu i harim tok gris bilong Jon Teosin na ol i taitim bun na i wok kopra na wok kakao na bringim i kam long bakstua bilong Jon. Sosaiti ya i mas salim na bungim mani na planti moa i mas kamap kwik-taim.

Na Jon wantaim ol lida Hahalis ol i painim trabel wantaim Gavman bikos Jon i tambuim ol 5000 memba bilong em long baim takis long Gavman. Em i tok olsem, ol i baim nating na Gavman i no save helpim ol liklik. Long dispela taim Gavman bilong

Australia i bosim Papua Niugini, Administret long Mosbi na Praitin Minista bilong Australia i kros long dispela man nating Jon Teosin. Orait, Gavman i salim 150 plisman na sampela kiap i kam long kalabusim lain Hahalis. Nogat. Ol i no inap. Jon wantaim 1000 man na 200 meri i paitim ol plisman wantim spia na sarep na ston na stik samting.

### JON GO KALABUS

Bihain long laik bilong em yet, Jon i go kalabus wantaim memba bilong Sosaiti. I tru, wanpela mejistret i mekim kot na 588 i lus kot. Tasol bihain bik kot bilong Australia i kapa-saitim tok bilong mejistret na ol man ya i go fri na Jon nau i hambak tru.

Long dispela taim long 1960 samting, Hahalis Sosaiti i kirapim olkain pasin nogut. Ol i wokim bikpela haus pamuk ol i kolim Bebi Gaden.

Ol i Katikis bilong Katolik Sios bipo, tasol long 1960 em i tromoim tok bilong God na i pulim lain bilong em i go long-we long ol lotu. Ol Pater bilong Hanahan na Lemmananu i kros tru long Jon na lain bilong em. Lotu i wok long pundaun nabaut long olgeta hap nau.

Stat long 1970 samting, Gavman na Misin i tingting strong long olkain we long helpim ol viles i no bin go insait long wok kago bilong Hahalis. Gavman i skulim ol pipel long groim gutpela kakao na em i wokim ol faktori ol i kolim fermenteri bilong redim kakao. Na Misin tu i helpim ol pipel na i kirapim wok somil na i laik bai ol viles pipel i gat

gutpela haus plang. Olsem na ol i ken amamas long ples long ol na tok gris bilong Hahalis i ken popaia long ol.

### LES LONG SOSAITI

Bihain long 6-pela yia samting, sampela ples i les long givim nating ol kakao na kopra long Hahalis. Ol i singaut long Winmani, Jon i bin promisim long ol. I no gat samting i kamap. Nau ol i les na i surik. Tude wan wan viles i gat sosaiti bilong em na i no insait wantaim Hahalis moa. Tasol planti pipel i kros yet na i laik save, ol mani bilong ol i lus i go we.

Tude sapos yu kamap long ples Hahalis, olsem Wantok ripota i bin mekim, ya ken painim Jon Teosin i sindaun long bikpela haus kapa bilong em. Jon i no lapun. Em i gat samting olsem 45 krismas. Em i het kela na i gat waitpela gris na em i patpela liklik. Jon i sindaun long bet ain i stap. Em i gat sik. Ol dokta i bin autim wanpela ston long bel bilong em. Ston ya i pasin rot bilong pispis.

Jon i tok, em i orait gen. Tasol em i no pilim strong yet. Em i sindaun wantaim meri bilong em tupela i bin marit 20 yia bipo long Hanahan long haus lotu. Tasol tupela i no gat pikinini.

### 1976 OL I STAT LONG GO DAUN

Stat long yia 1976, strong bilong Hahalis Welfea i stat long go daun. Long dispela taim ol Hahalis i kirapim pait wantaim long ol Hanahan. Tupela man bilong Hanahan i dai na nau ol Hahalis i pret na i wet bai ol

Hanahan i kam bekim long ol. Nau ol Hanahan i les na bikpela taim bilong ol i lusim Sosaiti. Hahalis lida Sawa Karatis i go kalabus nau long dispela pait.

Na isi isi tu ol Hahalis i kam bek long lotu. I tru, Jon i tokim Wantok ripota, em i no pasim ol pipel long go lotu. Tasol wanpela samting i pretim ol yet. Olsem na ol i no laik kam.

Pater Lanarre, bipo tru em i pater bilong Hanahan na em i bin grisim Jon Teosin fru. Na em i tambuim lain Hahalis na Jon long kam long ol pahra-men. Olgeta ol i tromoim lotu.

Tasol long yia 1978 Pater Lanarre, i kam bek gen long dispela hap bilong Buka na em i bungim Jon Teosin long Hahalis. Tupela i krai na i sekan na i kamap pren gen. Tasol Jon i winim hap rot tasol long kam bek long Katolik Sios. Em i no laik go lotu long Hanahan. Ating em na lain bilong em i sem o i pret. Olsem na Peter Lanarre i laik mekim Misa long Hahalis yet, tasol Jon i no laik.

### BRINGIM BODI BILONG PATER

Bihain long sampela mun Pater Lanarre i dai. Nau Jon i strong long ol i mas bringim bodi bilong Pater i kam long Hahalis bai ol pipel i ken krai long em. Long dispela taim ol i mekim Misa long Hahalis na ol pipel i lukim Jon i kam bek long ol sakramen.

Tasol Jon i no kam bek olgeta. Na ol Hahalis tu i wan-kain. Wanpela samting i pasim ol yet. Ol i stap hap rot.

Long Hahalis, tude i gat bikpela komyuniti skul. Ol lokal Buka Sista i save skulim ol sumatin long tok bilong God. Bikpela lain yangpela pipel i bin kisim baptais gen tasol i no gat sampela papamama bilong ol i sambai long dispela taim. Nogat tru. Na nau tasol Bisop Gregori Singkai i givim konfirmasio long ol. Na wantaim moa ol papamama i stap longwe yet.


### KAMBEK LONG LOTU

Pater Lucken bilong Hanahan i laik mekim isi long ol Hahalis i ken kam bek long lotu. Nogut ol i sem na ol i pret long go lotu wantaim ol birua long Hanahan. Olsem no Pater Lucken i tokim ol long wokim wanpela haus lotu bilong ol yet long Hahalis na em bai kam mekim misa long ol. Jon Teosin na ol Hahalis i orait long dispela tok, tasol i no gat samting i bin kamap.


Sapos yu askim wan wan Hahalis bilong wanem em i no laik kam tok tru long lotu, em bai tok, "Mipela i pret." Tasol ol i pret long wanem samting? Ol i pret long husat? Dispela samting i hait yet. Olsem na rot i no op tru yet.

I gat sampela man i ting olsem, long ples i gat sampela bikpela man i holim pawa tru na i bosim Jon Teosin yet. Husat i ken save? Yumi wet pastaim.

● Frank Mihalic



Jon Teosin long 1980 taim em i stori wantaim Wantok ripota long haus bilong em long wik i go pinis.



Jon i sanap wantaim tupela poro bilong em long ples bilong haus bilong em.




Bisop bilong ol Not Solomons Bisop Gregori Jon i wok nau long kambek insait long sios gen.



Plantu ol pipel i wok long kambek gen long lotu.


Ol Hahalis Welfea Sosaiti memba wokabaut mas i go kalabus long ailan Sohano. Gavman i salim ol i go kalabus long mekim save long ol na traim mekim indai dispela wok bembe.



Nupela Toyota Lite Ace i save winim ol narapela lik lik kar bilong karkarim manmeri. Igat strongpela 1300cc ensin i no save usim planti benzin na sia inap long tenpela pasindia. Toyota Lite Ace — lukim nau long Ela Motors klostu long yu.



*Usim lik lik benzin!*



*Karkarim tenpela manmeri!*



*Gutpela han stret.*



*Planti spes!*

# TOYOTA LITE ACE



**ELA MOTORS**

PORT MORESBY PH 25 4088

LAE	42 2322	MADANG	82 2188
MT HAGEN	52 1888	WEWAK	86 2255
RABAUL	92 1988	KIMBE	93 5155
KIETA	95 6083	POPONDETTA	29 7240
KAVIENG	94 2132	GOROKA	72 1844

GS984(P)

# EDUKESEN i NAMBA WAN WOK



Bihain long bik-pela ileksen long Solomons Ailan Peter Kenilorea i holim gen wok olsem Praim Minista.


Insait long palamen bilong Solomons Ailan i gat 38 memba. Long dispela namba 25 i bin vot long Kenilorea

long kamap Praim Minista.

Taim ol i makim em kamap praiminista, Kenilorea wantaim Pati bilong em Yunaitet Pati (16 memba) i bung wantaim ol independen memba (11) na kirapim nupela gavman. Kenilorea i

givim 6-pela wok minista i go long ol dispela independen grup. Na Yunaitet Pati yet i holim 6-pela arapela wok ministri.

Mista Kenilorea i tok, wanpela bikpela wok gavman bilong em bai putim i go pas em long Edukesen. Gavman



bilong em bai traिम long kamapim gut ol wok bilong edukesen. Wol Beng tu i wanbel wantaim dispela tingting bilong Kenilorea.

Planti bilong ol

memba bilong palamen krismas bilong ol inap long 30 yia tasol.

Na tu planti bilong ol i bin go kisim save long ol kantri olsem Papua Niu-

gini, Fiji, Australia na Nu Silan.

Mista Kenilorea i tok, gavman bilong em bai glasim gut wok bilong edukesen, na ekonomik developmen.

Na Mista Kenilo-

rea i laik bai wanpela man Solomon i kisim wok olsem Het ov Stet. Em i tok olsem, kantri bilong em i laik mekim pren yet wantaim ol arapela kantri.

● Gemini Nius

# AMI BILONG AMIN PAIT YET

Planti soldia bilong Uganda na Tanzania i bin kirap nogut taim ol lain bilong Idi Amin i kamap long kem bilong ol. Planti bilong ol i bin dai insait long dispela taim.

Long taim ol dispela ami bilong Amin i kamap insait long kem ol soldia bilong Uganda na Tanzania i wok long amamas long independens selebresen bilong ol.

Insait yet long ples bilong Amin, Koboko, moa long 300 soldia i dai pinis.

Ol dispela soldia bilong Amin nau ol i stap long boda bilong Sudan na

Uganda. Ol i bin go insait long dispela kantri taim ol soldia bilong Tanzania i bin helpim ol pipel bilong Uganda long rausim Amin olsem Presiden.

Taim ol dispela soldia i ranawe i go planti bilong ol i karim ol samting bilong pait i go wantaim ol. Na ol i wok long mekim save long ol tarangu pipel husat i stap long ol liklik ples klostu long boda. Gavman bilong Sudan i save olsem ol dispela soldia i karim ol samting bilong pait, tasol ol i no bin traिम long stapim ol.

Long kirap bilong dispela yia gavman bilong Uganda i kis-

im ripot olsem ol soldia bilong Amin i bung long ol boda bilong kantri. Tasol ol i ting olsem em ol i tok win tasol.

Tasol nau gavman i kirap nogut long harim ol ripot olsem ol soldia bilong en wok long dai long han bilong ol dispela lain.

Tasol sampela bilong ol dispela soldia bilong Amin i les long pait. Planti bilong ol i laik go bek na sindaun long ples bilong ol insait long Uganda. Ol i tok, bai ol i wet inap bihain long bikpela ileksen long Desemba 10.


Amin yet i bin go kamap long sampela

kem bilong ol dispela soldia na toktok wantaim ol. Amin i hait i stap nau long Saudi Arabia. Em i wok long pasim toktok long traिम na kisim gen pawa insait long Uganda.

Tasol tripela bikpela politikal pati i wok long kros namel long ol yet.

## KROS LONG BIKTAUN

Taim ol dispela kros i wok long kamap long Kampala biktaun bilong Uganda, ol soldia bilong Amini i stap long ol boda taun na wok long kilim ol soldia wantaim ol pipel. Nau ol i wok long muv i kam daun long kisim ples ol i kolim Soroti na




Tororo. Sapos ol i kisim dispela ples bai ol inap pasim dispela bikpela rot i go kamap long kanti ol i kolim Kenya.

Sapos ol soldia i pasim dispela rot, gavman bilong Uganda bai painim taim stret. Long wanem Uganda i stap namel

long ol 5-pela kantri.

● Gemini Nius



Nupela balus bilong nevi bilong Englan. Ol i kolim "Si Harier." Ol i save apim plua bilong sip pastaim olsem yu lukim hia long poto. Ol i apim pinis ol i sutim balus i go antap olsem supsup bilong banara.

SKUL  
BILONG

STUAKIPA



# WOK BILONG OL SKUL BILONG STUAKIPA I SKULIM YU NAU LONG BENK

**LESEN NO: 14**

PASIN BILONG RAITIM SEK

SEK em i wanem samting — Dispela em i wanpela gutpela we bilong baim ol bikpela samting. Yumi raitim sek tasol na yusim long baim bikpela samting long en. Yumi no mas karkarim planti mani i go long baim samting yumi laikim ya.

- (1) Mak bilong mani yu i gat i stap yet bihain long taim yu bin raitim las sek bilong yu.
- (2) SEK BAT — dispela hap bilong sek bai stap yet long sekbuk bihain long taim yu raitim sek na brukim long baim samting.
- (3) Em nem bilong man yu raitim sek long baim em.
- (4) Em nem bilong beng i holim mani bilong yu na i mas peim man yu raitim sek long en ya.
- (5) Dispela hap i soim sapos yu putim sampela mani long sekbuk bilong yu (bihain long yu raitim las sek bilong yu) o nogat. Long hia yumi lukim olsem yu i no putim sampela mani yet.
- (6) De yu bin raitim dispela sek.
- (7) Dispela i soim olgeta mani yu bin i gat bipo yu raitim dispela sek.
- (8) Namba bilong dispela sek. Dispela namba bai helpim beng yet na man beng i mas peim ya sapos i gat trabel bihain.
- (9) Em i soim hamas mani yu laik rausim taim yu raitim dispela sek.
- (10) Mani yu laik rausim ya, yu mas raitim long toktok pastaim na bihain, orait, yu mas raitim gen long namba.
- (11) Em i soim hamas mani yu i gat i stap yet bihain long taim yu raitim dispela sek.
- (12) Oltaim yu raitim sek, yu mas baim takis i go long gavman. Sek hia i soim olsem, bai yu baim 6t takis olgeta taim yu raitim sek.
- (13) Olgeta taim yu raitim sek pinis, orait yu mas putim tupela lain namel long sek. Na bihain yu raitim "not negotiable" i stap namel long tupela lain ya. Em i min sapos man yu baim em long sek ya i lusim dispela sek, nogat arapela man i painim sek ya i ken kisim i go long beng na kisim mani. Man ya baim em tasol inap kisim mani long dispela sek.
- (14) Em triknem bilong yu. Sapos beng i lukim na em i wankain long triknem yu raitim na givim ol pastaim ya, orait, ol bai peim man yu raitim sek long en ya. Sapos triknem i luk narakain, beng i no inap peim man i kisim dispela sek i go long ol. Nogat tru.

00100	PAPUA NEW GUINEA BANKING CORP.	00100
3 MAY 1978	WEWAK, P.N.G.	3 MAY 1978
To Garamat Enter.	GARAMAT ENTERPRISE, Wewak	OR Bearer
For Inv. No 136		
BALANCE B/F	1,060 00	
DROA		
TOTAL	1,060 00	
MISC DROA		
TOTAL	1,060 00	
THIS CHECK	49 80	
BALANCE C/F	640 20	

PAY TO THE ORDER OF GARAMAT ENTERPRISE, Wewak

AMOUNT IN WORDS: FOUR HUNDRED AND NINETEEN KINA EIGHTY LOAK = 419.80

NO. NEGOTIABLE

J. A. Carter

Sek em i wanpela oda i tokim beng long peim mani i go long man i holim dispela sek.

Nem bilong dispela man i stap tu long sek.

Long taim yu i gat sekbuk, yu i ken raitim sek tasol na baim wanem samting yu laikim. Em i min bai yu i no mas karkarim bikpela mani raun raun o putim biakpela mani long haus bilong yu. Dispela kain em i gutpela, long wanem, ol stilman i no inap stilman mani bilong yu. Na olgeta mani bilong yu i hait gut i stap long sekbuk.

**TUPELA HAP BILONG SEK**

(Olsem yumi lukim pinis ya, sek i gat tupela hap).

(a) Dispela hap em yu bai raitim na baim samting long en. Ol i kolim SEK FOM.

(b) Dispela hap em bai i stap long sekbuk olsem tok save bilong papa bilong sekbuk yet. Ol i kolim SEK BAT.

Wok bilong raitim sek em i save bungim tripela man olgeta.

DROA (DRAWER) — Em papa bilong sek. Em i rausim mani long sekbuk bilong em long taim em i raitim sek.

PEYI (PAYEE) — Em dispela man, papa bilong sek i laik peim em.

DROI (DRAWEE) — Beng i kisim tok save i kam long droa long peim mani i go long peyi.

## EM GUTPELA BENK BILONG STUAKIPA

PAPUA NEW GUINEA BANKING CORPORATION



## Man i wok hat

Dia Edita — Inap yu givim mi liklik spes na bai mi autim liklik wari bilong mi. Wari bilong mi i go olsem.

Planti taim mi lukim ol man bilong ples ol i kisim kumu na kulau i kam putim long maket na makim prais olsem 20t. Na bai sampela man o meri ol i go askim ol na bai ol i tok, 20t long kulau. Na man ya i kirap na tok, gutpela samting we na bai yu kostim bikpela mani?

Ol i tok olsem na man, bai pes bilong ol i drai nogut tru na ol i kirap na i go. Mi lukim dispela pasin i no gutpela long mi olsem na mi rait na laik tok olsem, em i laik bilong man.

Olsem, em i hatwok kamapim samting na i kam putim 20t long en. Sapos yu wari long mani, maski no ken baim dispela kaikai. Em tasol wari bilong mi. Yu husat brata o susa yu i stap long Madang yu lukim dispela pas bilong mi na yu bel kaskas o i laik sapotim mi, orait, bekim pas long Wantok Niuspepa na bai mi ken lukim.

Kaku Fimo, Amron, Madang.

## Nem i holi

Dia Edita — Plis yu inap givim mi liklik spes na bai mi autim liklik wari bilong mi. Plis olgeta brata na susa, yupela i mas harim dispela pas o tok save bilong mi.

Ol brata na susa, yupela kisim nem bilong buk Baibel em i no gutpela. Yupela i kisim nem olsem Jon, Pita, Jems, Stiven, Pol na Maria. Na sampela i kisim nem bilong ol ensel tu.

Gabriel na Imanuel em i nem bilong ol ensel. Ol brata na susa, yupe-

## Tok nating

Dia Edita — Plis inap yu givim mi liklik spes na bai mi bekim pas bilong wantok ya Robert Amat bilong Lahir Ailan long Nu Ailan Provins i kamap long Wantok Niuspepa namba 339.

Yes wantok, toktok bilong yu em i no tru. Na yu tok, Oposisen i save mauswara tasol. Olsem nau mi no bilip long toktok bilong yu.

Yu bin tok tu olsem, Somare i wokim tupela rong. Em i pasim rais na kisim bek Misis Rooney long haus kalabus. Olsem na yu krai planti long dispela tupela mistek Somare i mekim insait long Gavman. Mi tokim yu tru. Nau nupela Gavman i mekim mistek long planti wok na mani.

## Wokim gut rot

Dia Edita — Inap yu givim liklik spes na mi autim liklik wari bilong mi. Wari bilong mi i go olsem.

Rot i go long Amdital Plis Stesin long Ambum veli i go antap long Londor Katolik misin i bagarap olseta. Dispela rot na ol bris i nogut pinis na ol kiap i kam na kisim kaunsil takis yet.

Ol i karim ol bek na ol buk bilong ol i kam long kaunsil tim na kisim takis. Bilong wanem na ol i kisim takis? Ol i no wokim rot na bris. Mipela i laik bai yupela i wokim ol rot na bris pastaim. Na

Na dispela toktok mipela PNG manmeri i harim long redio na lukim long Wantok Niuspepa. Ating tok bilong yu em i no tru. Somare Gavman i bringim yumi kamap selp gavman na tu bringim yumi kisim independens. Na nau yumi i stap fri.

Ating yu krai tasol long kaikai moa rais. Mobeta yu yet planim rais long viles bilong yu. No ken toktok nabaut long ol Gavman. Em tasol wari bilong mi. Na yu husat man o meri i bel hevi o yu laik sapotim mi, orait, rait tasol long Wantok Nius na bai mi ken lukim.

Etama Waukuma. Badihagea viles, Mosbi.

bihain i kam kisim takismani long mipela.

Yupela ol kaunsil i no balus na kalap i kam kisim takis. Yupela i wokabaut i kam long graun wantaim lek. Na traim wokim gut ol rot pastaim plis.

Em tasol liklik wari bilong mi.

Leo Leri, Londor Katolik Misin.



no mekim wok olsem ol, yu mas lusim dispela nem bilong Baibel na kisim wanpela nem bilong ples.

Mi save, yumi i gat planti nem bilong tumbuna bilong yumi. Na tu mi save, sampela man bai amamas long pas bilong mi na bai sampela i belhat.

Sapos wanpela brata o susa i laik sapotim o egensim mi, rait tasol long Wantok Niuspepa na bai mi amamas tasol long lukim. A. Baru. K. Goroka, Isten Hailans.

## Kisim save nating

Dia Edita — Tenkyu tru long raitim dispela liklik tok bilong mi we mi tingim i no stret long mi. Bai mi tokaut na ol brata na susa bai harim.

Em gutpela ol susa i go long skul long kisim save. Tasol taim ol i pinisim haikol ol i save marit hariap o ol i wok inap olsem wan o tupela yia tasol na ol i save marit. Wanpela samting em i gutpela long dispela taim em ol meri i kamap het long ol wan wan Dipatmen na tu long Palamen. Em i gutpela long ol susa bilong nambis tasol, mi no tingim ol susa long hailans.

Taim ol i pinisim gret 6, larim ol i stap long ples na helpim mamapapa na painim man tu. Mi no ting, em i gutpela long ol meri hailans i go skul, na

kisim save na kamap haus waif. Na tu ol i save kisim ples bilong ol yangpela boi. Larim ol yangpela manki i skul na kisim gutpela save na kamap gutpela na strongpela lida bilong kantri.

Bihain taim mi laikim Bot ov Mensesmen na ol komiti bilong skul i mas kisim ol manki tasol. Na no ken kisim ol meri. Em mi toktok long ol meri hailans tasol na i no ol meri bilong nambis.

Em tasol liklik tok bilong mi ol susa na brata. Husat i ting, toktok bilong mi i no stret na i laik egensim mi o sapotim mi rait tasol. Bai mi amamas long lukim.

Offu Mofrave, Kainantu, I.H.P.

## Bekim bilong bikmaus

Dia Edita — Inap yu givim mi hap spes na mi bekim pas bilong susa Aviason Mao, long Wantok Niuspepa namba 340 bilong Sarere 8 Novemba 1980.

Yes susa bekim bilong mi olsem, nau mi laik askim yu:

1 Bilong wanem na yu kolim mipela ol man dok?

2 Bilong wanem na yu raitim, mipela i no pamuk meri?

Plis Aviason yu traim na tingting tu, orait, yu ken rait. Na yu tok yu gat boipren na yu bilong hailans na holidelong wok na kam

kisim malolo long Lae. Yes susa sapos yu prenim boi long Goroka na em i wok i stap long Goroka na yu kam raun long Lae, yu ting ol i save long boipren bilong yu o man bilong yu? Nogat.

Bilong wanem em i no save long yu gat boipren o yu marit meri, na traim na tingting gut orait, raitim gutpela wari bilong yu.

Em tasol na sapos yu gat bel hevi, orait, rait tasol i go long Wantok Niuspepa.

Ivan Aisaul, Rabaul, I.N.B.P.

## Rabis tok tok long lotu

Dia Edita — Mi laik bekim pas bilong Otto M Paimo, yu bin printim long Wantok Niuspepa bilong Sarere Novemba 1 1980.

I gat wanpela hap we em i tokim yumi olsem Otto i no amamas long ol i senisim misa long tok Latin. Em i tok olsem em i laik bai ol i mas wokim yet long Latin na i no long tok pisin o tokples. Dispela i no stret long tingting

bilong mi bikos mi ting yu no save long tok Latin.

Em i gutpela sapos ol i wokim long tok ples bai yu ken harim save na tingting long tok bilong Kraist. Sapos yu laikim long tok Latin, mi pret tru tasol em i no stret. Yu no bilong Jeman bai yu wokim lotu long tok Latin. Yu tok olsem dispela i mekim na yu no bilip long tanim bel na misa. Dispela i bikos

## Aikido i kamapim raskol

Dia Edita — Inap yu givim liklik spes long Wantok Nius na mi ken autim wari bilong mi? Wari bilong mi i go olsem.

Mi bin ritim wanpela Wantok Niuspepa namba 339 bilong Sarere 31 Novemba. Yes mi bin ritim i go na mi painim ol plis lainim wok Kung Fu. Mi lukim ol potu tu na mi amamas tru, tasol mi pilim i no stret tumas, as bilong em olsem. Sapos bihain taim ol plisman o sampela yangpela ya i lusim wok bilong Gavman na i go stap nating long ples or long taun bai ol olsem wanem?

Mi bin lukim planti ol yangpela plisman ol i bin bik-

het long wok na ol i rausim ol. Long tingting bilong mi, sampela long ol dispela manki ol i bin lainim wok Kung Fu o Aikido bai go long ples na lainim ol yangpela na kamapim ol gang nabaut long taun.

Sapos wanpela bilong dispela Aikido man ya, i mekim wanpela rong na ol i rausim em nogut bihain em i skulim sampela brata o wantok na bihain ol i kamapim gang na kamapim raskol em bai nogut tru. Mi ting olsem i gat strong pinis na bai ol i no inap surik long yupela ol plisman.

Kawe M Kukul Wau Morobe Provins

## Stopimol kauboi piksa

Dia Edita — Plis yu inap printim liklik wari bilong mi long Wantok Niuspepa. Wari bilong mi i go olsem, tude Papua Niugini i gat planti ol hambak man i wok long kamapim trabel long kantri bilong yumi.

Mi ting as bilong dispela ol samting em long Kauboi piksa na ol komikpepa. Ol yangpela man i save lukim dispela samting, na ol i save bihainim wanem samting ol i save lukim long Kauboi piksa na komik pepa.

Mi ting kantri bai i go bagarap

sampela taim bihain sapos ol i soim ol kain piksa olsem Kung Fu na Kauboi olgeta taim. Ol yangpela manki i luk save pinis long ol kain pasin bilong ol Kauboi na bihain ol i save traim na stail, pait, na kamapim sampela kain trabel long ol taun.

Na tu mi ting, olsem dispela samting i kamapim planti hambak man long kantri. Bipo tru i no gat raskol long Papua Niugini. Inap gavman bilong yumi i lukluk long dispela samting na stapim ol Kauboi piksa na ol Komik pepa.

Em tasol, liklik wari bilong mi, Tenkyu tru.

John Memeta Nago-Nago, NSP

Tok Save i go long ol man i save salim pas long Wantok Sapos yu no putim nem tru bilong yu long pas mipela i no inap prinim leta bilong yu.



Gaia Keros Yolasa Island Panguna





# Harim redio EHP

Dia Edita — Inap bai yupela givim liklik spes long mi na bai mi autim liklik wari bilong mi. Wari bilong mi i go olsem.

Olgeta taim mi save harim redio Isten Hailans i no save mis long pilaim wanpela singsing tasol. Dispela singsing ol i save kolim long (We are one for Ko Kole). Mi yet mi save harim na olgeta taim ol i no save mis long pilaim. Mi no save ol i gat dispela singsing tasol na i no gat narapela moa.

Traim mi pilaim ol narapela singsing. Mipela i les pinis long harim sem wan olgeta de.

Em tasol liklik wari bilong mi na yu husat i ting, mi rong yu mas pasim maus tasol na harim mi. Mi gat moa long tokim yu. Tenky 'yu.

Kuma Manoba, Jun Veli, Mosbi.

OLMANI MI MAS RAITIM PAS LONG WANTOK



# Komisin save mauswara

Dia Edita — Inap yu givim mi liklik spes na bai mi ken autim liklik wari bilong mi. Wari bilong mi em i go olsem.

Mi save lukim ol Hausing Komisin long Madang Provins i no gutpela tumas long ai bilong mi. Ol woka bilong ol i save giamanim mipela ol man i gat haus. Ol i tok, sapos mipela i baim dispela long olgeta fotnait bai ol i daunim rent i go daun. Na narapela tok mi save harim em ol i tok, sapos yu baim dispela haus i pinis olgeta, bai dispela haus em i bilong yu stret.

Tasol mipela i save baim rent bilong haus bilong

mipela long olgeta fotnait na no gat samting i kamap. Na tu mi no lukim wanpela man i bin pinisim rent bilong wanpela haus. Olsem wanem sapos ol i painisim bai ol i givim em yet?

Man ating, yupela ol Hausing Komisin woka bilong Madang tasol i save giamanim mipela na kisim mani nating.

Em tasol liklik wari bilong mi. Yu husat brata o susa i laik sapatim o egen-sim mi, rait tasol i kam long Wantok Niuspepa bai mi ken ritim.

Willy Alfred Soten, Siassi Ailan. Morobe Provins.

# Wokim gaden

Dia Edita — Inap yu givim mi liklik spes. Mi laik autim liklik wari bilong mi. Na wari bilong mi i go olsem.

Insait long Saten Hailans Provins, mi lukim planti yangpela man ol i no wokim wanpela gaden. Ol i wok long pilai kas tasol long olgeta de.

Na taim ol i go bek long haus, ol i hamaim ol meri bilong ol. Na husat i no gat meri, em i hamaim mama bilong em.

Ol wantok bilong mi, mi laik askim yupela. Yupela i mekim wanem kain wok tru na yupela i kam paitim ol meri bilong yupela? No-

gat sem bilong yupela.

Yu man yu mas wokim gaden bilong yu yet na lukautim ol famili bilong yu gut. Nogut ol i dai long hangre. Dispela liklik mani yupela i kisim long pilai kas ya yupela i mas baim liklik peket rais na wanpela tin pis na i kam givim ol lain i stap long haus.

Na i no gutpela yupela i kam paitim ol nating. Yupela i mas tingting long wokim gaden na helpim ol famili bilong yupela.

Em tasol liklik wari bilong mi.

Kobol Tiliba, Nipa, S.H.P.

# No gat Dvelopmen

Dia Edita — Inap yu givim liklik spes long mi bai mi ken autim wari bilong mi. Wari bilong mi i go olsem.

Longtaim tru Mumeng Kaunsil i sanap na i gat 11-pela kaunsil memba insait long Buang Sensus. Tasol i no gat wanpela gutpela wok i kamap insait long Buang. I no gat gutpela skul, haus sik, rot o projek. Rot i liklik tru olsem rot bilong rat.

Planti manmeri na pikinini na tu ol ka i save kisim bagarap long ol liklik rot long Buang. Olsem wanem dispela mani K10 kaunsil i kisim long olgeta krismas i save i go we? Ating dispela takis mani i bilong ol kaunsil yet bilong baim redio na ka bilong ol yet. Plis ol kaunsil bilong Buang inap yupela i painim we long opim dispela liklik rot bilong rat.

Longtaim tru i

kam inap nau i no gat wanpela gutpela samting i kamap bilong helpim ol pipel long dispela hap. Mi no save i gat wanpela man bilong Buang i sanap long Provin-sal Gavman o nogat. Sapos em i sanap, orait, traime na opim ai na maus bilong em na lukluk long ol dispela wok na mekim. Ol pipel i no makim yu long sindaun nating na kisim mani bilong gavman.

Plis wantok, traime na kamapim sampela wok long helpim ol tarangu pastaim, orait, tingting long kisim mani o pe bilong yu. Em i gutpela.

Em tasol liklik wari bilong mi. Husat man o meri i laik sapatim o egen-sim mi, rait tasol long Wantok Nius bai mi ken amamas long lukim. Tenkyu.

James Napo. Maun Hagen, W.H.P.

# Narakain banana

Dia Edita — Mi laik autim liklik stori bilong mi nau.

Wanpela banana yumi save kolim kalabua dispela banana em karim namel tru long graun. Na i go antap 2 mita em i karim na antap lip i stap long em tu.

Dispela banana i gat 11-pela lip olgeta i stap antap tru. Na namel long em em i karim banana. Tasol dispela banana em bilong wanpela

pasta bilong SDA misin. Tasol yumi no ken save Bikpela antap tasol em i save.

Nau em i wok long putim plaua na mi yet mi lukim tru long ai bilong mi.

M.K. Nemeko, Barclay Bros, ARAWA.

Tok Save i go long ol man i save salim pas long Wantok Sapos yu no putim nem tru bilong yu long pas mipela i no inap prinim leta bilong yu.

# Rait long tok pisin stret

Dia Edita — Mi rait long mi na ol arapela pren na save toktok, rit na rait long Niugini Pijin tasol.

Ating pastaim tru mi mas tok tenkyu long yu givim mi dispela spes we mi kamapim dispela toktok. Tenkyu tru.

Longtaim tru mi bin laik tokim yupela long dispela samting. Tasol mi lusim i stap inap nau. Mi no save, sapos ol arapela tu i bin traime long tokim ol tok save long dispela samting bipo tu o nogat.

Dispela BASET ripot bilong yupela insait long Wantok bilong wik i stat long Sarere 8 Novemba, 1980 i mekim mi raitim dispela pas.

As tingting bilong dispela pas bilong mi i olsem. Planti bilong ol nius na ripot nabaut em Wantok i save kamapim i save kam long Pijin - Ing-lis.

I gat planti bilong ol dispela Pijin - Ing-

lis toktok i stap. Tasol long hia mi givim tripela eksampel tasol. Baset, Dipatmen bilong Edita Jeneral, Foren Afeas na Tret.

Mi no save sapos ol man i no save ritim Inglis i harim (understand) wanem samting ol dispela Pijin - Inglis i min-im. Em i tru sapos yu kolim mi olsem "ating man ya i mas i stap buskanaka yet ya". Mi tingting long ol arapela pren/wantok na mi raitim dispela toktok.

Mi no save, sapos ol dispela rong o asua i stap long husat stret. Ol nius ripota o edita? Ating em i mas stap long edita, laka?

Mi laikim na mi bilip, ol arapela tu i laikim Wantok i mas kamapim ol nius ripot samting long Tok Pisin stret we yumi i ken lukim na tok "Tru, Wantok Niuspepa em i niuspepa bilong ol Papua Niugini stret".

Kaiyu Wentoh Jr, K-9-2, Isten Hailans.

# Takis lus nating


Dia Edita — Plis inap yu givim mi liklik spes na bai mi autim liklik wari bilong mi. Wari bilong mi i go olsem.

Mi wanpela boi bilong Malol long Aitape Wes Sepik Provins. Mi save lukim ol kaunsil long Aitape i save kam long ples na kisim takismani. Ol i save

kisim K8 long wan wan man na dispela mani i go lus nating.

Mi no lukim wanpela samting i kamap long ples bilong mi long Malol. Em tasol kompen bilong mi i go long ol kaunsil bilong Aitape.

Gabriel Wamre, Malol viles, W.S.P.



# Ranger 4x4 NA 4x2

I KAM LONG

**PACIFIC** MOTORS

YU YET KEN SKELIM

**Hino** King of the Road



SALIM KUPON IGO LONG PACIFIC MOTORS HINO TRAK DIVISIN PO. BOX 326 PORT MORESBY

PLIS SALIM MOA INFOMASIN LONG HINO TRAK

NEM \_\_\_\_\_

ADRES \_\_\_\_\_

TELEPON \_\_\_\_\_

BISNIS BILONG MI \_\_\_\_\_

Salim tok save i kam long TOK SAVE, Box 1982, Boroko.

\* TOK SAVE bilong mi i go long ol brata bilong Saka hap bilong Wapenamanda, Enga Provins. Mi Karo Yopo i salim dispela tok save long yupela. Dispela tok save em bilong ol lapun mama. Em bilong mipela ol yangpela man, long dispela taim mipela sindaun na tingim pastaim mipela long Saka 9-pela kaunsil na 15,000 tausen pipel, mipela slip long bus na ol memba ol i no helpim yumi. Rot long Wapenamanda na Saka em i bagarap na ol i no helpim yumi. Ol i go kisim bikpela mani na ol i no tingim yumi. Na tu mipela lusim bikpela mani long takis na no gat kaikai i kamap. Em mipela lusim mani nating. Neks ileksen yumi mas sanapim wanpela man yet bilong Saka. Tok save i kam long Karo Yopo.

\* TOK SAVE i go long Wilson Sara. Yu bin stap long Hayfield Vokesenel Senta long yia 1979. Yu bin lusim mi na go long Tuvi Vokesenel Senta. Olsem na mi i gat bikpela wari tru long yu na ol gutpela wok yu bin lainim mi long en. Na sapos yu lukim dispela tok save na yu laik rait long mi, orait, rait long dispela adres, Mathew Huasi, P.O. Box 2073, Lae, Morobe Province. Tok save i kam yet long wanpela sumatin bilong yu long Hayfield Vokesenel Senta long yia 1979.

\* TOK SAVE i go long Lepa Luru long Pangia Komyuniti skul long Saten Hailans Provins. Kandere, mi laik askim yu. Long 3 - 10 - 80, mi bin salim tripela siot na tripela trausis long yu. Yu kisim pinis, o no-gat? Mi askim, long wanem, yu i no bekim kwik pas long mi. Olsem na mi laik askim yu. Sapos yu kisim pinis na yu lukim dispela tok save bilong mi, orait, yu mas bekim pas kwiktam na bai mi ken save olsem, yu kisim ol dispela samting pinis. O sapos wanpela wantok i save long dispela liklik kandere bilong mi, plis tokim em long dispela tok save bilong mi. Em hia adres bilong mi. Steven T. Were, Melanesian Hotel, P.O. Box 756, Lae, Morobe Province.

\* TOK SAVE i go long Zachary Kilikira nau i stap tis long hap bilong Rabaul. Mi Raymond Nakiti salim dispela tok save. Mama bilong yu em indai pinis long 4 Novemba, 1980. Mi bin kisim pas i kam long ples na ol i tokim mi long dispela samting. Ol i bin laik rait long yu tu, tasol ol i no save long adres bilong yu. Olsem na ol i no rait. Sapos yu laik rait long mi, em hia adres bilong mi. Sub Constr, P.O. Box 568, Madang Province. Husat tisa i save long em, plis tokim em long dispela tok save bilong mi.

\* TOK SAVE i go long Mista Benjamin Yapisona Enga. Yes kandere yu lusim ples long yia 1973 na mipela i no lukim yu liklik. Sapos yu i stap long wanem hap yu mas salim pas i kam long mi. Ol sampela wantok i bin tokim mi olsem yu stap long Is Sepik o Wes Sepik. Mi no bin harim gut ples yu i stap long en. Sapos yu lukim dispela tok save orait, yu rait i kam na salim adres bilong yu. Mi kandere bilong yu mi gat draipela wari tru long yu olsem na mi salim tok save. Tok save i kam long Samue Aputigi Yopo. Sapos yu laik salim pas plis salim i kam long dispela adres Bena Yopo Kulea Yagage, Nikana Wholesalers, Box 630, Arawa, Bougainville, N.S.P. Phone namba 95 1277 ext 228.

\* TOK SAVE i go long Mani Gomoru long Bulolo, Morobe Provins. Mi laik tok save long yu olsem, taim mi lusim yu long ples na kam wok hia, mi no tok save long yu na mi kam. Na tu mi lusim tingting long yu. Tasol yu tingim mi yet na yu raitim pas long mi. Mi bin kisim na mi bekim pas bilong yu pinis. Tasol yu i no bekim dispela pas bilong mi yet. Sapos yu lukim dispela tok save bilong mi, orait, yu mas bekim. Em tasol. Tok save i kam long Murape Gomoru his long Kieta Holtel, Not Solomons Provins.

# SMOLBRATA KILIM BIBE0



Bipo bipo tru i gat tripela brata, Mekuri (bikbrata), Tufuve (namba tu brata) na Vegagofa (smolbrata). Tripela brata ya i lusim bikpela ples na i go stap longwe tru antap long wanpela bikpela maunten. Em i bikos tripela i pretim wanpela tewel meri.

Dispela tewel meri nem bilong em Bibeo. Oltaim em i save kam daun long bikpela ples na kilim wanpela man o meri long kaikaim sapos em i hangre. Olsem na tripela brata ya i pret na i go wokim liklik kem bilong ol antap long bikpela maunten longwe long bikpela ples.

Tripela i stap na kamapim tingting long kilim dispela tewel meri. Orait, long wanpela apinun nau, bikbrata, Mekuri i kisim banara na spia bilong em na i go painim abus long bus. Em i tok, sapos tewel meri Bibeo i bungim em, bai em i autim tiket stret bilong Bibeo.

Mekuri i go insait tasol long bikbus, tewel meri Bibeo i smelim em pinis na i kam sambai i stap. Mekuri i no save. Em i lukim wanpela bikpela pisin tru i sindaun antap long han bilong wanpela diwai.

Em i makim na kisim stret bros bilong pisin ya. Na dispela

pisin i karim spia pun- daun stret long han bilong Bibeo. Na tewel meri ya i kisim pisin tasol na kaikai i stap.

Bibeo i laik trikim Mekuri olsem na em i tanim olsem wanpela naispela yangpela meri tru na i sindaun kranki i stap. Mekuri i kam lukim em na em i guria nogut tru. Mekuri i kirap na askim em, susa, yu lukim abus mi bin sutim ya tu?

Bibeo i tok, mi kaikai pinis. Oltaim mi save traim painim abus tasol ol abus i save rana- we lusim mi. Inap yu kilim wanpela abus long mi?

Tewel meri ya i tok, wanpela kapul i stap antap long diwai ya. Mi bai go antap na sekim em pundaun na yu kilim. Tasol yu mas taitim banara na lukluk i go daun long graun.

Mekuri i harim tok na taitim banara na lukluk tasol long graun. Bibeo i go antap long diwai na kwiktam kisim tamiok em i save kilim ol manmeri long en ya na tromoi i kam daun na katim het bilong Mekuri.

Bibeo i amamas nogut tru. Em i kam daun na karim man ya i go bilong kaikaim. Tupela brata long ples i wet wet na tripela de na tripela nait i lus na

ting nau. Wanpela apinun na Tufuve i laik go long bus na painim abus na traim painim brata bilong em tu.

Em i kisim banara na spia bilong em na givim i go. Wantu tewel meri Bibeo i smelim em pinis na em i tanim em yet olsem wanpela yangpela naispela meri tru na i kam sambai i stap.

Tufuve tu i kilim wanpela abus na abus i kam pundaun stret long Bibeo. Orait, tewel meri ya i kisim na kaikai i stap. Namba tu brata ya i kam bungim dispela naispela yangpela meri i sindaun i stap na em tu i guria tru.

Em i kirap na askim Bibeo long abus bilong em. Na meri ya i mekim wankein tok olsem em i bin mekim long bikbrata ya. Tufuve i no save. Olsem na Bibeo i trikim em na kilim em tu na karim i go bilong kaikaim.

Smolbrata Vegagofa i wet wet inap tripela nait. Orait, em i kirap kisim banara spia bilong em na i no go bilong painim abus. Nogat. Em i laik go painim tupela brata bilong em na dispela tewel meri Bibeo.

Em i givim i go insait long bus na tewel meri ya i save pinis olsem, wanpela man i

kam. Orait, em i go wetim em i stap. Vegagofa i kam lukim wanpela pisin i stap na em i sutim na dispela pisin i go pundaun stret long dispela tewel meri.

Bibeo i kisim na kaikai i stap. Vegagofa i kam na bungim dispela naispela yangpela meri long bikbus na skin bilong em i kirap. Em i save pinis, dispela em tewel meri tasol ya.

Bibeo i mekim wan- kain tok tok olsem em i bin mekim long tupela brata bilong em bipo pinis ya. Tasol Vegagofa i bekim na tok, mipela i save putim ai stret long abus long taim mipela i laik sutim abus.

Tewel meri ya i pret nau. Em i save olsem, dispela man i no olsem ol arapela man bipo ya. Em i bekim tok na i luk olsem ating, em i klia long trik bilong tewel meri ya pinis.

Vegagofa i bekim tok i stap tasol wanpela tingting i kamap long em. Olsem na em i kisim wanpela gutpela spia bilong em tru na holim i stap na lukluk go daun. Na tewel meri ya i stat go antap long diwai long sekim abus i kam daun.

Man ya i putim ai bilong em i go daun long graun tasol em i givim

hap ai i go long dispela tewel meri. Em i lukim tewel meri ya i go antap na lusim tamiok na i laik tromoi i kam daun long nek bilong man ya.

Vegagofa i lukim tamiok i kam daun na em i kalap kwiktam tumas na tamiok i abrusim em. Em i kirap tasol na givim spia stret long baksait bilong tewel meri Bibeo. Tewel meri ya i pilim pen na autim tupela longpela tit bilong em na paia i wok long kamaut tu wantaim.

Bibeo i givim i kam daun na Vegagofa i wok long sutim olgeta spia em i gat. Tarangu tewel meri i kam daun na olgeta spia i pas long baksait wantaim. Em i kam pundaun long graun na indai olgeta.


Vegagofa i katim het bilong tewel meri ya na karim i go long bikpela ples. Ol manmeri i lukim olsem na ol i amamas nogut tru. Ol i kisim dispela het na i go planim long namel bilong bikpela ples.

Nickie V Susuve June Valley, Port Moresby



**God I Lukautim Wanpela Meri**

2 King 4:2-7



**OL ISREL I KALABUS**

ILAIISA I TOK BAI MAN BILONG GIVIM DINAU BAI I KIRAP NOGUT TRU LONG TAIM EM I KAM BILONG KISIM MANI BILONG BEKIM DINAU. MERI I NO INAP BEKIM.

YU GAT WANEM SAMTING LONG HAUS BILONG YU?

WANPELA BOTOL WEL EM TASOL.



YU GO ASKIM OL WANTOK LONG GIVIM YU PLANTI BOTOL. KISIM PINIS, ORAIT PULIMAPIM WEL LONG OL BOTOL. NA YU MAS BILIP LONG GOD BAI I HELPIM YU.

ORAIT DISPELA MERI I GO KWIKTAIM NA I KISIM PLANTI BOTOL.

MAMA, MI KISIM SAMPALA MOA BOTOL. WEL I STAP YET, A?

I GAT. MI PULAPIM OL DISPELA BOTOL. TASOL WEL I STAP YET. ILAISA I TOK MI MAS PULAPIM PLANTI BOTOL MOA.



EM NAU, OLGETA BOTOL I PULAP TRU. GOD I WOKIM WANPELA GUTPELA MIRAKEL TUMAS.

EM I RAN I GO TOKIM ILAISA.

MI PULAPIM OLGETA BOTOL PINIS. EM I GUTPELA WEL TRU. SORI, MI TENKYU TRU LONG YU.

YU MAS TENKYU LONG GOD, EM YET I BIN HELPIM YU. LARIM OL MAN I BAIM DISPELA WEL NA KISIM MANI NA BEKIM DINAU. NA HAP MANI BAI I STAP. EM BILONG YU.



MERI I TENKYU TRU LONG GOD LONG EM I BIN HELPIM EM. NA BIHAIN MERI I SALIM OLGETA BOTOL WEL NA KISIM MANI NA WETIM MAN BILONG GIVIM DINAU I KAM. ORAIT LONG MONINGTAIM TRU EM I KAM.

OL WOKBOI BILONG MI I STAP WE? MI TOK YU MAS RED I NA WETIM MI. OLSEM WANEM?

MI RED I PINIS. OL PIKININI YUPELA I KAM AUSAIT.



Kristen Buk Melanesia (Box 488, Vewek) i tanim dispela komik i tamap olsem buk bilong ol. Sapos u laik yu ken baim long ol. Used by permission of the David C. Cook Foundation. Copyright 1973. David C. Cook Publishing Co. All rights reserved.

**lotu nius lotu nius lotu nius lotu nius**

**TEN YIA PLEN BILONG GUTNIUS LUTERAN SIOS**

Ol 5-pela hap i kamapim Gutnius Lutheran Sios i yesa pinis long wanpela plen em Plen Komiti bilong ol i kamapim. Dispela em 10 yia plen bilong Gutnius Lutheran Sios. Dispela plen i kisim tupela yia olgeta long kamapim. Ol i plen long olkain samting GLC i laik kirapim na wanem samting ol i ting, ol i mas i gat. Dispela plen tu i lukluk long olgeta skul na ples em GLC i ranim. As bilong dispela plen em i bilong strongim wok kamap bilong GLC insait long narapela 10-pela yia bihain.

Ol i laik bringim olgeta memba bilong GLC i kam klostu wantaim insait long wok bilong Baibel stadi, na ol famili i bung wantaim na beten, na ol wok bilong helpim komyuniti na ol wok bilong bringim tok bilong Gutnius insait long laip bilong olgeta manmeri.

GLC i plen long kamapim gut pasin prea, pasin bilong autim gutnius na pasin bilong trenim ol yangpela long wok lotu. Ol i bilip

olsem, long 10-pela yia bihain, bai ol i gat planti manmeri moa i kam insait long lotu bilong ol. Na tu bai ol i gat inap samting long mekim olkain wok bilong ol.

Wanpela bikpela tingting tru bilong ol em long traime bungim olgeta Lutheran long PNG wantaim. Dispela plen i bilongstat long 1981 i go inap long 1990.

Kaunsil bilong Gutnius Lutheran Sios i bung long 25 i go inap 28 Novemba long skelim dispela plen. Pinis, orait, bai ol i printim dispela ripot na salim i go long olgeta lain i insait long GLC.

**PNG BAPTIS YUNION KISIM PAWA** — Nau ol pawa bilong mekim wok na pasim tingting i stap long han bilong Australia. Long wanpela kibung bilong ol lain Baptis ol i holim long Maun Hagen i no longtaim i go pinis, ol i pasim tok wantaim Australia long givim dispela pawa i kam long han bilong PNG Baptis Yunion yet long lukautim.

**Sande Lotu**

**SANDE NAMBA 4 BILONG ADVENS**

21 Desemba 1980. Matyu 1: 18 - 24

Stori bilong tude em i stori bilong bikpela wari bilong Sen Joseph taim em i painim Maria i gat bel, na tupela i no bin slip wantaim. Long pasin bilong ol Juda, Josep inap kotim Maria na lusim em.... Tasol em i laikim Maria tumas, olsem na em i ting long lusim em nating, na em i ken go bek long papamama. Josep em i bel nogut tru. Em i bin painim wanpela namba wan meri tru; na nau wanem samting i bin kamap? Na Maria i no bin tokim em tu....Josep i wari nogut. Tasol long nait wanpela ensel i kam na i tokim em olsem "Josep, yu no ken wari. Maria i no bin mekim wanpela rong. Em i no bin slip wantaim wanpela man. Nogat. Em i gat bel long Holi Spirit bilong God tasol. Orait, nau Josep i belgut gen.

wet liklik, skelim gut ol samting pastim. Harim! Olgeta samting na olgeta manmeri i gat tupela sait bilong ol. Yumi save lukim wanpela sait tasol. Wet! Yumi traime painim na lukim arapel sait. Bai yumi ting arakain.

Long dispela stori Josep i givim yumi gutpela eksampel tru long pasin bilong tingting gut long arapela man. Yumi no ken skelim pasin bilong ol arapela manmeri hariap. Yumi no ken sutim nating tok i go long ol....Tasol em i pasin bilong yumi olgeta.

Em i pasin bilong manmeri bilong graun, yumi save painim hariap ol samting nogut. Yumi aipas liklik long painim gutpela samting. Yu ken mekim wanpela pilai bilong soim dispela tok i tru. Yu kisim wanpela bikpela pes waitpela pepa. Orait, nau namel long em yu raitim wanpela blakpela poin tasol. Nau yu soim dispela pepa long sampela manmeri na yu askim ol, ol i lukim wanem samting? Olgeta bai tok olsem "Mi lukim wanpela liklik blakpela poin i stap namel long pepa." Tru tumas. Tasol dispela blakpela poin i liklik tumas, na ol i lukim. Tasol bikpela pes waitpela pepa, ol i no lukim. Olsem wanem? Yumi wankain. Yumi no save lukim hariap tumas ol bikpela gutpela samting long narapela manmeri. Tasol yumi save painim hariap tru ol liklik hap pipia na rong i stap.

Yumi ting nau long wari bilong Sen Josep long stori bilong tude. Man, sapos yu lukim Maria i gat bel, ating yu bikmaus na kros nogut sapos yu man bilong em, na yutupela i no bin slip wantaim yet. Gat bel i min wanpela samting tasol. Na watpo Maria i no bin tokim Josep? Ating dispela i soim em i gat rong..... Josep i ken tingting olsem....na yumi no gat tok. Tasol nogat. Josep i wet, i brukim het bilong em long tingting. Em i no mekim wanpela samting hariap, olsem na God i helpim tingting bilong em.

Wantaim moa, yumi mas bihainim pasin bilong Sen Josep long stori. Yumi no ken putim hevi hariap long narapela manmeri. Yumi wet pastaim. Nogut yumi mekim olsem wanpela man i baim klok bilong soim sapos ren i laik kamap o nogat. Em i kamap long ples, na i gat mak long klok i tok olsem: bikpela raunwin i laik kam. Man i lukim klok na em i kros; em i ting klok i bagarap. Em i paitim, paitim. Tasol nogat. Dispela tok i pas i stap: bikpela raunwin. Man i belhat tru na i resis i go bek long stua bilong bikmausim man i salim dispela klok nogut long em. Em i kamap....tasol stua i go pinis olgeta. Raunwin i kamap na i karim em i go olgeta olsem wanpela lip bilong tri. Nau dispela man i save: klok ya i bin tok stret: raunwin bai kamap. Na em i kamap pinis. Watpo dispela man i no bin wet pastaim?


Olsem Jisas i tok long narapela ples: "Yu no ken kotim arapela man, na bai yu tu yu no kot."

I gat sampela pipel i ting ol i save olgeta samting. Ol i save ritim tingting bilong yumi. Ol i save tok bek bilong olgeta kwesten. Ol i save pinis watpo olgeta manmeri i mekim wanpela..I no gat samting i hait long save bilong ol...Ol i olsem God tru. Ol i sanap kotim olgeta pipel na olgeta samting....Na i no gat wanpela manmeri i laikim kain pipel ol. Yumi no ken kotim olgeta manmeri hariap. God tu i no save mekim olsem. Yumi mas mekim olsem Sen Josep, na

Yumi ken kisim skul long dispela samting. Manmeri i wet, na i no putim hevi hariap long narapela, em bai win.

# PAINIM ROT

Long las wik yumi painim rot long namba tri. Na bai yumi traim namba foa. Traim painim rot wantaim ai tasol pastaim. Sapos ai i raun, orait, yusim pensil long helpim yu.



# PASEL NAMBA 15


Insait long dispela pasel, i gat tenpela tok yumi save yusim long tokaut long pasin o kain sindaun bilong wanpela man. Em hia ol dispela tok. GUTPREN, SAVEMAN, NAISPELA, MAUSWARA, MARIT, TISA, SMAT, AIPAS, SPAK, LESMAN.

A G U T P R E N  
 S R O M T I S A  
 A T A I A N A M  
 V I R W M O V S  
 E A P K S R E E  
 M S I A T U M L  
 A L E P S I A N  
 N A N S E L S M

Ol nem i ken go long raithan, na long lephan, na antap, na daunbilo, na long kona i go long kona. Yu ken yusim wanpela leta planti taim.

# TRAIM AI

Ansa bilong las wik, 1 na 5. Lukim. Dispela sikispela bataplai i luk wankain tru. Tasol tupela tasol i wankain. Yu traim ai na painim. Ansa long neks wik.




# BIABIA



# Nabuto



# TIGERMAN i TOK BAI MI POSTIM PATRIK i GO BEK LONG FIJI



Kusak 'Tigerman' Kamanak, hatim trening i stap. Dispela raithan bai slekim Patrick Wong bilong Fiji long Fraide.



Welta Wet na Feda Wet boksen sempion bilong yumi, Mark "Smoking" Apai, na Kusak "Tigerman" Kamanak i pasim tok pinis long soim Fiji olsem ol i no inap long tupela.

Long Fraide 28 Novemba, Mark bai i go insait hamaim wantaim Benny Tabua bilong Fiji. Benny i wanpela namba 1 boksa long mak bilong Welta Wet. Em i win 37 taim, na lus long 2-pela taim tasol.

Kusak bai taitim bun wantaim Patrick Wong bilong Fiji tu. I no gat planti ripot bilong Patrick long we em i save pait.

Kusak i tok, olgeta pait bilong em, em i win tasol. Em i tok em i no inap isi long dispela Patrick Wong bilong Fiji.

Kusak i tok, em

bai autim tiket bilong Patrick na postim em i go bek long Fiji.

Mark bai bagarapim Benny Tabua long strongpela lephan bilong em. Mark i bin autim pinis planti boksa long dispela lephan bilong em.

Long dispela pait bilong ol, Mark bai traim long yusim lephan bilong em long autim Benny. Benny tu i wanpela strongpela man bilong pait na Mark i mas lukaut. Sapos Mark i rong liklik em nau Benny i no inap wari long isi long Mark.

Trena na Menesa, Mista Salter i redim pinis narapela pait bilong Kusak na Mark bai i kamap long Rabaul long mun Desemba. Ol i no save yet long wanem ol boksa ol bai pait egens.

Welta Wet sempion, Mark Apai i tromoi kis i go long ol pipel long Goroka taim em i winim Kerry Bell long wanpela pait long dispela yia. Mark i redi tasol long slekim Benny Tabua bilong Fiji long Fraide 28 Novemba.

## YUT KAUNASIL TOKAUT

Enga Yut Kaunsil Tokaut (Hia em wanpela pas Enga Yut Kaunsil i salim i go long minista na autim ol hevi bilong ol.)

DIA MINISTA,

Mipela i sori tru long ol tarangu yangpela manmeri bilong Enga. I luk olsem, ol i no inap kisim wanpela gutpela samting long taim bihain. Nogat. Na bai planti long ol i raun nating na dring olgeta de.

Long 10-pela yia i pinis ya, namba bilong ol skul dropout i kamap samting olsem 20,000. Na i no gat wanpela lida i luk save long dispela bikpela wari bilong ol skul dropout bilong Enga yet.

I kam inap nau, i no gat wanpela samting i kamap yet bilong traim pinisim dispela wari. I no gat tru. I no gat wanpela man i raun kaunim ol skul dropout yet.

NO GAT WOK

Dispela kain olsem na planti yangpela i no gat wok na i no gat gut taim bilong ol long taim bihain. Em planti dispela yangpela pipel tasol i save kamap raskol na wokim planti hambak pasin.

Nau, planti gutpela yangpela man i go na wok long ol arapela provins. Ol i go bilong wok na painim liklik poket.

I luk olsem, sampela pipel ting, i gutpela long opim planti klap bilong salim bia. Na ol i ting, dispela kain bai grisim ol dispela yangpela man i kam bek long Enga. Ol i save giman olsem, ol dispela klap bai kamapim gutpela sindaun bilong ol pipel bilong Enga.

Ol i mekim ol dispela giman tingting na i no tingting long ol pait na olkain trabel nabaut i save kamap long provins. Nogat tru.

Tasol, ating planti long yumi i save pinis. Enga i no inap kamap na go het gut sapos K2 milion i goaut long provins bilong baim bia. Na bekim bek bilong dispela bikpela mani em ol pait, ol skul

na ol viles stua i pas, i gat olkain trabel i kamap long ol famili na planti yangpela i dring bia olgeta de. Na ol dispela yangpela man i no save givim han long developim viles. Nogat olgeta.

Wanpela we bilong stretim dispela wari bilong ol yangpela em long helpim wok bilong ol yut insait long Enga. Na em hia sampela we bilong helpim wok bilong ol yut.

1. Soim olsem, yumi i sanap klostu tasol long givim han long wok bilong Enga Provinsal Yut Kaunsil.

LUK SAVE  
LONG WARI

2. Luk save long wari bilong ol yangpela nau na kamapim plen bilong traim pinisim ol dispela wari.

3. Helpim ol yangpela long olkain samting. Na salim saveman long skulim ol moa olsem bai ol i gat save bilong helpim ol arapela pipel long kamapim go het long provins. Em ol samting olsem skul bilong helpim ol bikpela manmeri.

4. Putim kamap ol wok fama na ples bilong trenim ol yangpela long mekim ol wok fama long ples.

5. Kamapim olkain liklik senta bilong lain wok kamda na wok bilong mekim olkain samting long ain.

6. I mas i gat maket bilong baim samting em ol yangpela i kamapim long fam bilong ol. Yumi mas kamapim dispela maket.

Em sampela tingting tasol. I gat planti moa. Dispela wari em i bikpela samting tru. Na long plenim ol we bilong pinisim dispela trabel o wari i bikpela wok tu.

Olsem na i moa gutpela long kamapim wanpela ripot bi-long dispela samting. Husat brata o susa i wari long ol dispela wari bilong ol yut na i wari long mekim Enga i gutpela ples bilong sindaun long taim bihain, plis mipela i askim yu long rait na givim mipela sampela aida bilong yu.

SIAMAN, E.Y.K.



Matilda bilong Malagan i tulet pinis o? Nogat. Em i kisim poin pinis long Malagan.



Yupela lukim, Yokomo enitaim. Elsie Nelson bilong Yokomo putim olgeta masel i go insait long hamaim bal. Sori Mazda Carps autim em 11-9.

I kam long pes 24

bilong nupela pitsa bilong ol, Joe Pupua. Pupua i no tromoi gut bal na ol pilaia bilong Mazda Carps i wokabaut isi tasol na winim poin.

Mazda Carps na William Magel i strongim tim bilong Kabi.

Long arapela A gret pilai bilong ol man em Braun Igels i winim Demons, 14-1. Na Hanza Be

i winim namba wan pilai bilong em long dispela sisen long taim em i winim Chebu, 11-10.

#### OL MERI

Long las wiken, Yunaitet so fbal tim bilong ol meri i

strong na winim Daikin Kapit. I luk olsem, Yunaitet i go pas long poin nau na Daikin Kapit na Wes i namba tu.

Yunaitet i no stat gut tumas long stat bilong sisen. Em i

bin lusim tupela pilaia. Long dispela taim em ol pilaia bilong Yunaitet i pilai riabaut tasol.

Long namba tri pilai bilong ol nau, em ol i pilaia i klia long ples bilong ol-

geta pilaia bilong ol. Olsem na nau Yunaitet i win moa. Dispela gutpela pitsa tru bilong Yunaitet em i Nancy Kamara.

Strong bilong Yunaitet i stap long meri i tromoi bal ya.

Tasol olgeta arapela meri tu i save pilai strong. Wampela gutpela pilaia tu em i kepten na ketsa bilong tim, Misis Pouru.

Long las wiken, Yunaitet i pilai gut.



Meri bilong Mazda Carps sekim bal nau. Kain olsem na em i winim Yokomo long las wiken.



Em kisim gut bal na bal i flai nau. Lukaut Yokomo. Neks taim yu traim ol gen. Ating bai go.

**PHANTOM**  
COMIC

Phantom komik namba 695 i gat tupela gutpela stori tru. Namba wan stori i bilong tupela susa i laik grisim Phantom na bai Phantom i maritim wampela long tupela. Tasol yumi save olsem, Phantom i gat meri pinis. Bai tupela meri ya i win o nogat? Ol busman i save tok, Phantom inap winim olgeta hambakman. Tasol em i no inap winim olkain trik bilong ol meri.

**NO 695**

## LAIK TRAIM ABA

Wampela boksa bilong Fiji i laik traim winim namba em John Aba bilong Papua Niugini i holim nau. Dispela namba em i Komonwelt junia lait wet taitel.

Na dispela boksa i laik winim taitel ya long John Aba em i Jale Fotu. Trena na menasa bilong Fotu, Mista Tomasi Sivo i tok, em i laik pasim tok wantaim ol bilong kamapim ol pilai boksen long Fiji, C.C. Singh long

bai ol i kamapim dispela pait long Lautoka.

Na em i laikim bai dispela pait i kamap long February. Bihain Wili i kam long Mosbi na Aba i winim em gen long poin.

Em i pait wantaim Wili Tarika long Fiji na winim Wili. Bihain Wili i kam long Mosbi na Aba i winim em gen long poin.

**Wantok**  
**Spot**

# GASEL NO INAP

Elkom i stap long namba tu ples nau wantaim Gasel long Mosbi A-gret sofbal bilong ol man. Long Sande klostu Gasel i win tasol Elkom i strong tru long tupela las ining na winim Gasel, 14-12.

olgeta na mekim foapela ran. Ol i mekim tupela ran gen long las ining na winim dispela pilai tu. Ol man i pilai strong long Elkom em Eliab Koniel na William Daniel. Na Jack Pidik na John Milipapa i strongim tim bilong Gasel.

Em i pasin bilong Elkom. Long stat bilong pilai, ol bai pilai isi. Tasol long taim pilai i hat nau, bai ol i hat wantaim. Long Sande, Gasel tim i go pas 5-0 long namel bilong namba tu ining.

Tasol bihain long namba tri ining nau, Elkom i kisim 3-pela ran na Gasel i stap 7. Las tripela ining nau pawa bilong Elkom i strong tumas long Gasel.


Tupela tim wantaim i mekim sampela asua long filding bilong ol. Olsem na pilai i no gutpela tumas.

Long namba wan ining, Gasel i mekim tupela ran. John Milipapa na Mariko Tako i mekim dispela tupela ran. Na long tri ining, Dominic Valuta, Penny Tonga na Milipapa gen i mekim tripela ran bilong Gesel.

Yangpela pitsa bilong Gasel, Emil i tromoi bal gut tru. Em i givim hat taim liklik long ol pilaia bilong Elkom na ol i no paitim gut bal. Tasol long namba tri ining nau, ol Elkom pilaia i luk save long we em i save tromoi bal na ol i paitim gut bal.

Em nau tripela pilaia bilong ol i winim poin. Long namba foa ining Gasel i go pas yet long poin. Elkom i mekim 5-pela ran na Gasel tu i mekim 5-pela ran.

Long namba foa ining Elkom i hat



Wanpela Malagan i paitim bal pinis, tasol em i no kisim gut. Ketsa bilong TMG i redi long holim bal nau.



Sori TMG Panthers i tulet, pinis. Malagan i holim bal pinis. Malagan i win 9-5.

# AIR NIUGINI

## HELPIM KANTRI GO HET

THE NATIONAL AIRLINE OF PAPUA NEW GUINEA



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.